


T 2720/8261

16

Harvard College Library Imaging Services <http://imaging.harvard.edu>

CM	0	1	2	3	4	5	6	7	8	9	10	11	12	13	14	15	16	17
Lab D50 2'	95/0/2	81/0/0	66/0/0	51/0/1	35/0/0	20/0/0	29/19/-54	55/-39/33	42/57/29	82/4/79	51/50/-13	50/-28/-29						
	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68						



遜國臣記叙

高皇親賢好士砥礪英豪雖戡亂尚嚴威行
實均造物之心天下鼓於向往建文繩武敬體益敦人重名節
士習廉耻試觀革除遺事當時死義之臣何多考書契以來未
有盛於此者也

文皇仗義周公師陳江上金川不守本

高皇帝親嫡子豈易姓比况英毅豁達遠邁建文使智如管仲
以忠

高皇者忠

文皇他日齊名楊蹇亦無不可胡乃甘飴於赴鼎取適於捐生
宗嗣奄滅而守不移朋屬既殲而心不動精金以百煉益勁長
河雖萬折必東壯烈泣鬼神血誠貫天日方陳暴鐵之節尤為

哈佛大學哈佛燕京
圖書館藏

皎皎而周景諸公相時委曲終完大義他若知名無考有迹無名者不可勝數又寧無名迹俱泯詩不見於蛾眉幾豫決於色舉者乎蓋自推戴留名外人人苟息豫讓矣此其浩然天植夫豈聞彼伯夷古稱商家一代之人心風俗臣竊謂

高皇作人之化更爲過之書曰既歷三紀世變風移

高皇變夷爲華誕敷文德茲方三紀而養士之報若此自是以後四十八年乃有己巳之變去戊申八十餘年德教愈深宜有文丞相李侍郎者光我中華咸於建文可也於時死綏授命之士寂無聞焉豈人不古若遽大相異乎爾耶夫平時危言繫行與臨難抗節死忠其致一也己巳以來又百二十年廷臣危言潔行固多可表求其格心善俗歷歷如吳長孺唐韓休宋田錫歐陽修者殊未易得即得之未安於位也度之濟難槩可知矣

嗚呼人才閔氣運之盛衰士氣係人才之隆替竊欲詳述國諸臣以附名臣不惟彼之不可泯亦見此之不可忽有風教之責者庶其感動於斯也時

嘉靖丙寅初秋朔進士鄭履淳謹叙

建文遜國臣記目錄

第一卷

魏國公徐輝祖

文學博士方孝孺

兵部尚書齊太

太常卿黃子澄

刑部侍郎張易

按察僉事湯宗

燕府長史葛誠

燕府伴讀余逢辰

兵部尚書鐵鉉

吏部尚書張紘

禮部尚書陳迪

刑部尚書侯太

刑部尚書暴昭

第二卷

都指揮謝貴

都指揮彭二

都指揮馬宣

都指揮朱鑑

太寧守將卜萬

都督廖鏞

都督孫岳

都指揮瞿能

都指揮宋忠

都指揮余瑛

都指揮彭聚

都指揮孫太

都指揮汪得

都指揮陳質

都指揮楚智

都指揮皂旗張

指揮王資

指揮崇剛

指揮趙諒

指揮宋瑄

指揮張倫

衛鎮撫曹濬

衛鎮撫楊本

千戶倪諒

所鎮撫周拱元

第三卷

禮部侍中黃觀

吏部侍郎毛太

戶部侍郎卓敬

戶部侍郎盧廻

戶部侍郎郭任

禮部侍郎黃魁

兵部侍郎陳植

兵部侍郎徐壘

刑部侍郎胡子昭

御史大夫練子寧

御史大夫景清

都御史毛大芳

都御史陳性善

大理少卿胡閏

太常少卿盧原質

太常少卿廖昇

大理寺丞鄒瑾

大理寺丞劉端

大理寺丞彭與明

左拾遺戴德彞

第四卷

開國公常昇

越雋侯俞通海

駙馬都尉梅殷

長興侯耿炳文

駙馬都尉耿璿

涿城侯李堅

安陸侯吳傑

歷城侯盛鏞

江陰侯吳高

都督耿璿

都督劉貞

都督趙清

都督楊文

都督徐銳

第五卷

翰林修撰王叔英

翰林編修王良

翰林編修程濟

衡府紀室吉周是

給事中陳繼之

給事中韓永

給事中黃鉞

給事中譚共太

監察御史曾鳳詔

監察御史董備

監察御史葉希賢

監察御史魏冕

監察御史王度

監察御史甘琳

監察御史高翔

監察御史王彬

監察御史鄭公智

監察御史韓郁

叅軍斷事高巍

行軍斷事錢芹

戶部主事巨敬

國子監博士黃彥清

宗人經歷宋徵

欽天監副劉伯完

按察使王良

叅政鄭居貞

按察副使程本立

按察僉事胡子義

按察僉事林嘉猷

知府葉惠仲

知府王璉

知府姚善

知府徐安

知府黃希范

知府孫鎮

知府陳彥回

谷府長史劉璟

遼府長史程通

知州蔡運

知縣顏伯瑋

知縣鄭恕

理問徐讓

縣丞劉亨

縣丞衛捷

教授陳思賢

教諭王省

主簿唐子清

吏目鄭華

典史周縉

典史黃謙

盧振

牛景先

周璿

謝昇

龔翊

儲福

松江同知

舉人劉政

生員高賢寧

第六卷

某部郎中梁田玉

中書舍人梁良玉

中書舍人何申

中書舍人宋和

中書舍人郭節

梁良用

梁中節

何洲

郭良

雪庵和尚

河西備

川中補鍋匠

馮翁

東湖樵夫

第七卷

戶部尚書王鈿

工部尚書嚴震直

侍郎學士王景

侍郎學士董倫

大理少卿薛昂

少卿學士高遜志

國子監祭酒張顯宗

侍講學士王達

翰林侍讀唐愚士

翰林侍講樓璉

翰林侍書宋懌

尚寶司丞李得成

監察御史尹昌隆

國子監博士王紳

子孫

按察司僉事葉砥

知府劉有年

典史魏澤

衛卒羅義

第八卷

都督平安

都督審忠

都督潘忠

都督袁寧

都督楊松

都督馮溥

都督陳虎

都指揮房昭

都指揮唐禮

都指揮孫狗皮

都指揮葛進

太監吳亮

建文遜國臣記第一卷

吾學編第五十二

海鹽鄭曉

文皇即位之歲八月得建文時群臣封事干通命解縉等檢閱
凡言兵食事宜者留覽其詞涉干犯者悉焚不問

建文四年十一月都御史陳瑛請治建文諸死事臣 文皇曰

彼食其祿自盡其心爾勿問又曰諸臣盡忠于

太祖故盡忠於建文但惡其導誘建文變亂成法耳

永樂十一年正月勅法司解建文諸臣禁令

十四年諭法司奸惡齊黃等遠親未拿者悉俟來告者勿理

二十一年十一月劄諭禮部尚書呂震盡赦諸死義家於是稍

稍有言建文時事者諸死義家人亦稍復還廬里

吉水人劫錢習禮為練子寧姻為讐家所持習禮惶急楊榮為

白 上上欣然曰使練子寧在朕國當用之况習禮乎

仁宗即位之歲十一月劄諭禮部尚書呂震曰建文中奸臣正犯悉受顯戮其家屬初發教坊司錦衣衛浣衣局習匠功臣家奴今有存者既經大赦並宥為民給還田土

洪熙元年 仁宗撰長陵碑文稱建文君雖追廢猶書其沒曰崩當其在位猶尊之曰朝廷又諭群臣曰若方孝孺輩皆忠臣詔從寬典於是天下始敢稱孝孺諸死義為忠臣云

睿皇復辟之年釋建庶人吳庶人繫令自便

吏部侍郎楊守陳曰國可滅史不可滅我 太祖定天下即命儒臣撰元史靖難後史臣不紀建文君事遂使建文數年朝廷政事及當時忠於所事者湮沒不傳及今采輯尚可補國史之缺草奏欲上以病不果

南京吏部侍郎儲瓘曰方正學一時諸公必不可泯又曰永樂初節行之士尤見志尚所在某不自揆念其忠於所事嘗欲蒐其遺事稍發其潛

弘治中台人繆恭學古行高晚年走京師上六事其一紀絕屬請封建庶人後為王奉祀懿文太子通政司官見恭奏大駭罵恭蠻子何為自速死繫恭兵馬司獄劾上待命賴 敬皇明聖詔勿罪放恭還鄉

弘治中給事中金谿吳世忠請表祠方孝孺周是修練子寧黃子澄鄒瑾魏冕顏伯璋齊太諸死義者

嘉靖十四年給事中雲南楊傑請表揚建文諸忠臣下禮部議議未上 今皇帝因召對禮官問曰昨給事中言建文諸臣事云何復言對曰諸臣誤君亂國先朝誅殛豈宜褒錄 今皇帝

色變曰言官得無誚朕言對曰言官本書生初入仕聞人言建文諸臣死事時甚烈以故輒為陳說耳 今皇帝色霽明日上議亦不罪僕

魏國公徐輝祖

徐輝祖中山王長子初名允恭 太祖賜名輝祖身長八尺五寸洪武二十一年嗣魏國公二十六年遣諭北平防胡明年練浙江海上兵防倭二十九年會禮部翰林院試國子師生第優劣移吏部錄用輝祖嘗侍 懿文太子學通經書大義從詹希元學善書字戊寅閏五月建文君即位特見信任八月兼太子太傅靖難兵起與齊黃盧振張昺葛誠通謀議督諸兵北進屢有功召還靖難兵至江上輝祖及開國公常昇分道出師禦戰將士往往離散不肯向敵遂還京 文皇即位勒罷尋幽繫永

年輝祖卒年四十 上曰輝祖與齊太輩罪同宜論死朕念中山王平定天下有大功於國家曲赦輝祖今輝祖病死中山王功不可無後令輝祖子嗣魏國公通給中山王沒後祿糧祖長子釋迦保見 上賜名欽嗣魏國公遂乞守墓 上怒謫居中都二十二年卒中山王四子次添福增壽緒長女 文皇后次代王妃次安王妃增壽素通欵於北平壬午秋靖難兵入金川門建文君手刃增壽於左順門廡下是年增謚武陽忠愍侯永樂二年增定國公子景昌嗣

文學博士方孝孺

方孝孺字希直一字希古古寧海人父克勤元末隱居國初守濟寧有惠政孝孺幼精敏絕倫雙眸炯炯日讀書積寸為文雄邁醇深鄉人呼孺為小韓子年十四五侍父宦遊齊魯間歷覽

孔子周公廟宅間陋巷舞雩所在從宋濂遊同門多天下名士
一旦盡出其下先輩如胡翰蘇伯衡皆自謂弗如孝孺顧未視
文藝恒以明王道闢異端爲己任進修所詣月異而歲不同世
咸以爲程朱復出嘗卧病絕糧家人以告咲曰古人三旬九食
窮豈獨我哉洪武十五年以吳沉揭驅薦召見 上喜其舉動
端整謂皇孫曰此壯士當老其才輔汝遣還鄉會仇家得罪詞
連孝孺籍其家械送闕下 上識孝孺名特開釋令奉祖母挈
妻子還二十五年又薦召至 上曰今非用孝孺時稍擢漢中
府學校教授日與諸生講明聖學蜀獻王間其賢聘爲世子師
孝孺每見必陳說道德王喜甚講經論文無虛日爲名其讀書
之廬曰正學皇太孫即位初廷臣交薦召爲翰林博士進侍講
尋陞侍講學士暨董倫侍經筵倫顧問孝孺德望素隆一時倚

重凡將相大政議輒咨孝孺 上好讀書每有疑即召使講解
臨朝奏事臣僚面議可否必命孝孺就宸前批答孝孺嘗作書
事詩曰斧戾臨軒几硯間春風和氣滿龍顏細聽天語揮毫久
携得香煙兩袖還又曰風軟彤庭尚薄寒御爐香遠玉闌杆黃
門忽報文淵閣天子看書召講官時大召名儒修 太祖實錄
及類要諸書孝孺爲總裁會改謹身殿名正心孝孺獻銘擬作命
神寶孝孺又獻頌皆規正君德比定官制改孝孺爲文學博士
靖難兵起日召謀議召檄皆出孝孺手兵旣渡淮及江上畫策
堅守誓死社稷建文君遜去 文皇以姚廣孝言召用孝孺不
肯屈繫獄一日遣人諭再三終不從又詔孝孺草詔必見悲慟
徵殿陛 上降榻勞曰先生無勞苦余欲法周公輔成王耳孝
孺曰成王今安在 文皇曰渠自焚死孝孺曰成王即不存何

不立成王之子 文皇曰國賴長君孝孺曰何不立成王之弟
文皇又曰先生無過勞苦置左右授筆札又曰詔天下非先生
草不可孝孺大批數字云云投筆於地又大哭且罵且哭曰死
即死詔不可草 文皇大怒命磔諸市孝孺慨然就戮為絕命
詞曰天降亂離兮孰知其由奸臣得計兮謀國用猶忠臣發憤
兮血淚交流以此徇君兮抑又何求嗚呼哀哉庶不我猶時年
四十六復詔收其妻鄭鄭先已經死宗族坐死者八百七十三
人孝孺和粹貞諒事親孝處師友篤恩義克勤守濟寧被誣謫
戍江浦上書乞以身代父不報宋濂葬夔州孝孺自漢中走荆
榛往祭奠且言之蜀王軫恤其孤婺備至與林右王紳郭濬劉
浩葉見太諸名士友善切磨道義被薦時王叔英與書大率以
時措之宜為言孝孺深然之及與政又輒慕古王政即欲見諸

行事以故多紛更卒無成效其文章大類蘇氏而正論過之嘗
謂道之於事無乎不在列為二十八箴又作雜誠三十八章以
自警謂化民必自正家始作宗儀九篇謂先王之治先德化而
後政刑作深慮論十首以篡臣女主夷狄雖一天下不可為正
統作釋統三篇多先哲所未發者四方夷裔得一字寶於金壁
所著有遜志齋集四十卷又有周禮考次大易枝辭武王戒書
註帝王基命錄文統宗史要言諸書逸不傳洪熙初 仁廟嘗
謂群臣曰若孝孺輩皆忠臣詔奸臣黨與從寬典方氏遺族始
有赦還鄉者因立祠堂祀孝孺成化初遺文始行或曰錄孝孺
家時得魏典史澤周旋歲其幼子以故孝孺尚有後謝文肅公
詩所謂系枝一葉是君恩也孝孺死節事至今百六十年人皆
歷歷能言雖人人殊其成仁取義之死靡悔斷然不可泯滅而

同時文學柄用之臣際會功名史有別書以故彭惠安公澤哀
江南詞有曰後來奸佞儒巧言自粉飾扣頭乞餘生無乃非直
筆澤字彥恩應天人為刑部尚書謫海寧

兵部尚書齊太

齊太溧水人初名德洪武二十年鄉貢明年舉進士歷禮兵部
主事會震謹身殿 上禱郊廟太以官九年無過得陪祀賜名
太三十年陞兵部左侍郎明年進本部尚書 上嘗召太問邊
將姓名大歷數無遺又問諸圖籍太出袖中手冊進簡要詳密
上大奇太是年閏五月受顧命輔皇太孫時諸王皆尊屬擁重
兵專制地嫌勢逼詔諸王臨邸中毋奔喪王國所在吏民悉聽
朝廷節制詔下諸王不說謂此齊尚書踈間我也嘗使北平北
平賂太太受歸請為兵費 上益倚重太 文皇時自燕邸入

臨至馬安太言上急出勅符勒歸國又與太常卿黃子澄建策
凡親王有罪輒除國建文元年靖難兵起太專主籌畫命將出
師上日召學士輩討論周官法度處便毀弄彘翰詔問外事一
付太太遂移檄指斥削屬籍或難之太怒曰名正言順敵乃可
服靖難兵遂以誅太為名上疏請發奸臣齊太黃子澄等與臣
訊究陛下即不發臣必不休兵且抵京赤地千里時尚遣諸王
監督諸軍太以谷王穗瀟師遁還慮遼寧二王近燕為變皆召
之還遼王至寧王竟不至二年靖難兵日進逼淮泗謫太子澄
官求解兵李景隆書于燕謂齊黃屏竄遐荒可息兵歸藩不聽
進兵益急尋召太未及還金川門開建文君遜去太追至廣德
欲往他郡起兵興復竟被執見 文皇不屈死之從兄弟敬宗
宰皆死叔時永陽彥等謫戍免甫六歲給配赦還今其子孫猶

存故居為鋪舍人猶稱尚書鋪云仁宗為長陵神功聖德碑述
建文君焚崩喪以天子禮匪燎非其罪者咸復之於是太等宗
黨皆得赦給還田土且戒天下毋得以奸黨相告訐云嘉靖中
知縣謝廷瀆為祠祀太嘉靖己酉予至深水造太祠見其五世
孫光裕即六歲兒之後也

太常卿黃子澄

黃子澄名湜以字行分宜人少受易歐陽貞書周與學春秋梁
寅有文行負盛名洪武十七年貢入太學明年進士舉禮部第
一授翰林編修陞修撰伴讀東宮累官至太常卿建文君為太孫時
坐東角門謂子澄曰諸王尊屬擁衆兵奈何對曰諸王僅有護
兵纔足自守萬一有變以六師臨之誰其能支漢七國非不強
盛卒底滅亡小大強弱之勢不同而順逆之理異也太孫喜每

呼子澄黃先生太孫即位尙任子澄謂曰先生無忘東角門之
言子澄頓首應曰不敢遂出與齊太議削奪諸王兵惟未幾周
王得罪建文君書諭 文皇文皇為曲解子澄曰燕周母兄弟
燕王出塞有功威名日盛不併去燕後難圖於是出兵開平諸
鎮各更置北平守臣伺府中事日急靖難兵遂起及耿炳文諸
將相繼敗北建文君召問子澄對曰勝負兵家常事今天下富
盛兵強食足區區一隅豈能當天下一全力聚兵五十萬四面並
進旦夕且成擒子澄遂薦李景隆為大將代炳文景隆尤昏懦
戰輒敗棄其師遁召還京又赦不誅子澄慟哭曰景隆出師觀
望懷二心不亟誅何以謝 祖宗厲將士練子寧亦執景隆於
朝且哭且數請誅之皆不聽江淮諸將連敗子澄拊庸慟哭曰
大事去矣誤薦景隆萬死不足贖誤國之罪賦詩云仗鉞曾登

大將壇貂裘遠賜朔方寒出師無律真見戲負國全身獨汝安
論將每時悲趙括攘夷何日見齊桓尚方有劍憑誰借哭向蒼
天幾墮寇靖難兵至淮上建文君不得已逐子澄且密使募兵
而以竄齊黃使告燕 文皇曰此緩我也請悉召吳傑平安盛
庸師還即已建文君爲遣少卿薛嵩請罷兵 文皇又不許兵
抵江干蘇州知府姚善言子澄文武才略卒捍國難顧屏諸賢
遠以快敵人胡失計至此始急召子澄責問不服族其家一子
走易姓名田經遇赦家湖廣咸寧正德辛巳進士黃表其後也

刑部侍郎張昺

張昺澤州人洪武中舉人才累官刑部侍郎二十八年四月轉
左建文君初即位諸大臣言藩王周代岷谷湘相繼變告藩國
所在宜簡精強謀略有威望者爲守臣彈厭萬出掌北平布政

司事與謝貴并受密命未幾詔讓 文皇昺貴遂集兵部著守

王成 文皇亦稱疾不出長史葛誠謂昺王無恙昺不信張王

朱能請 文皇起兵 文皇曰昺貴已先發非計擒二人不可

建文元年七月六日會朝廷遣人逮府中官校 文皇盡縛官
校置庭中召昺貴入與械去昺以爲 文皇見兵大集窘不得

已縛府中人獻朝廷不安防守遂憚二人入至端禮門內伏兵

起縛二人文皇擲杖起立曰我何病爲爾輩所迫耳昺不服死
之屍得還葬昺初至北平以吏李友直機警寄心復令詞府中

事友直輒先事泄昺謀以故府中得爲備昺死友直遂得爲北

平叅議靖難後族昺家焚殺近戚程亨輩戚疎遠及里人並戍

邊一子得避脫 文皇嘗夢有內披髮爲厲出焚其尸面色如生

昺家上滾墳在水南正德十五年知州馬汝驥立祠祀之汝驥

有行誼官至禮部侍郎謚文簡

按察僉事湯宗

湯宗未詳何許人爲北平按察僉事上言北平按察使陳瑛密受王府金錢有異謀逮瑛謫廣西靖難後瑛召還院窮治建文諸臣多坐夷戚恨宗亦論死

燕府長史葛誠

葛誠未詳何許人爲燕府長史靖難兵未起誠與張昺謝貴言府中事又嘗諫 文皇文皇稱病暑月圍火輒言寒三司官入問疾誠密告昺王非病以不得上心故誠又密疏聞上會燕人奏事京師遂執下獄得密謀踪跡即發符逮官校又令貴昺發兵內應盡簿錄王府人 文皇大恨殺誠族其家

燕府伴讀余逢辰

余逢辰字彥章宣城人爲燕府教授陞伴讀靖難兵未起逢辰頗聞其謀遺書戒其子自必死起兵時逢辰泣諫死之

兵部尚書鐵鉉

鐵鉉鄧州人洪武中國子生授禮科給事中調五軍斷事奏對詳明 上喜賜字鼎石藩府坐法刑官文翰不能奏常 上厲鉉立決 上益喜凡兩法司疑獄盡稿鉉未幾陞山東叅政建文二年李景隆駐德州鉉督餉飛芻挽粟水陸並進軍興不乏五月靖難兵圍濟南甚急鉉暨徐將軍盛統兵高僉憲宋叅軍張都統王太守王府校等悉立防禦令軍民詐降開城門候

文皇入急下鐵板幾中比出戰令軍士噪罵 文皇窘大怒攻至秋七月不能克舍之南去宋叅軍說鉉者曰濟南天下之中北兵今南去其留守北平者類老弱且未平保定雖叛諸郡縣

吾學編
堅守者寔多郭布政輩書生大叅公能出奇陸行抵真定南
朝諸將潰逸者稍稍收合不數日可至北平其間豪傑有文義
而起者大叅公便宜署部號召招徠之北平可破也北平破北
兵回顧家室必散歸徐沛間素稱驍勇大叅公檄諸守臣倡集
義勇候北平歸合南兵征進者晝夜躡之大叅公館穀北平休
養士馬迎其至擊之彼背腹受敵大難旦夕平耳鉉以軍餉盡
於德州城守三月士卒困甚而南將皆驚材無足恃莫若固守
濟南牽北兵使江淮有備北兵不能越淮歸必道濟吾邀而擊
之以逸待勞全勝計也乃設宴天心水回亭犒問卒苦述賦賡
歌激發忠義未幾又有東昌之捷建文君以却敵之賞賞鉉進
布政使再陞兵部尚書叅成庸軍務賜金幣誥命封三代鉉入
謝京師賜宴餽粟肉小河之建中原震動文皇欲北還以諸

將言再戰得勝遂長驅渡江鉉感憤欲自殺文皇怒極鉉尚
擁殘兵駐淮南已而擒鉉至不肯屈令一顧終不可得割其耳
鼻竟不肯顧撈碎其跡至死罵不絕聲時年三十七子福安戍
河池康安先卒仲名年八十二母薛安置海南

吏部尚書張紘

張紘字昭季富平人父月川文行知名紘洪武中舉通經爲東
宮侍書才識通敏太子器重紘洪武十二年冬陞通政司左叅議
試左通政十五年雲南平出爲右叅政陞辭上賦詩二章賜
紘歷進左布政使凡土地貢賦法令條格祠祀公廨上下典儀
經費程度悉紘裁定夷民爭說遠邇莫安是時雲南寓賢董倫
王景韓宜可輩不問識不識皆厚恤之以故遷謫至者如歸二
十六年三月秩滿入覲治行爲天下第一特令吏部勿考賜璽

書曰曩者討平西南夷命官撫守爾紘實先往任今五年言出則諸夷聽服令布則四野懽欣皆由誠信相孚克共乃職今年來朝不待考而朕知其功出乎天下十二牧之首故嘉汝績復命仍治黔南汝往欽哉賜宴及道里費三十一年召爲吏部尚書滇人如失父母時建文旁求遺逸日集闕下率命紘試鑑識精絕各當其材會修太祖實錄被旨試翰林編纂官考第高下紘得楊士奇策喜曰明達時務有用之才不但文辭之工也奏第一授王府審理副靖難後召紘及戶部尚書王鈞諭曰卿二人久事皇考習知典故今皆老矣其解識務月給尚書半俸居京師視時政有夙舊制者直告朕無隱庶稱厚望老成之忘紘出遂自經吏部後堂死紘嘗爲雲南公廨記曰公廨廣三十七丈袤百丈有尚段氏時稱東府元爲行省皇明底綏萬

方以洪武壬戌戡定雲南就置布政使司屋宇階庭雖有成績較之華夏則規模差陋唯堂俎寢其製頗精緻旋崇累節軒翔峻起但歷歲已久柱傾直漏者屢矣周廡之外儀以重門功緒甚略意精者其舊貫而粗者元之改作也東塽左右司以下西塽管勾聽以下屬寺悉附焉紘備員以來旋拒烏合之徒內訌而外叛兵既未休饑疫隨之口不暇給者凡五年歲丙寅始克儲材明年冬撤其堂而新之正六楹楹圍五尺棟九架而衍其前脊高四尋簷殺奪之半以強越二年再治材且因且革門寢暨經歷司始成其外門兩廊仍未易也初令有司計木之數與巨細若戶力之楹枘差而賦之轉致不立期一從其便其輿徒也較四州十二縣夫之壯者每一州縣均作三四番每番期十日乍作乍輟不敢妨其務不敢竭其力遷就數踰年而迄未畢

工如是乎其艱且滯者何也蓋兵民之後有征有屯有築有餉其大者如此其小者未可枚舉故不得已爲是迂拙之政誠不忍更促之也竊嘗論之雲南於古爲荒外不治之地山林幽阻民俗草昧各種各部如蜂蟻然無教令等威之制無宮室服用器業之資生理既不足繫其心又奇險可以容惡是以樂縱恣而安悖亂苟束之以法而強之以不能彼不信然相噬則缺然而長往矣昔在漢晉雖嘗設官亦即其要會而領之隋唐間頗置州郡皆不過羈縻而已固未嘗如中國間井其人也元以四夷氣類相近因而撫之爲宜然其弗靖者猶爾也是以志烈之士非不欲草薶而禽獮之顧其勢有所不行亦噤齟久之乃已徐而思之有如耐飢渴習霧露乘高走險殊死而不顧者乃其所長然而性多荒淫暗事機素無節制之可守雖則易合亦復

易雖智者察此則知所以制之矣必有人焉才兼文武而道濟方域曰德曰威曰勸曰信兼此四者而事不定人不安吾不信也故當無事則宜伏蕩簡易寬小過守大綱如班定遠之言或有蟲賊則乘其未滋霆掣電擊指的而中之以懲其餘斯亦攻心伐謀之大端夫如是良佈急者可牀下伏矣敬告來哲誠不知所以裁之洪武二一三年庚午閏四月十有八日

禮部尚書陳迪

陳迪字景道宣城人曾祖巨卿元江州路總管祖宥賢國初從征有功調撫州守禦百戶因家焉父仲康嗣百戶迪幼儻有志操洪武八年薦辟爲郡學訓導嘗爲郡草萬壽賀表上覽而異之十二年近臣薦召爲翰林編修十八年陞侍講預修大典二十四年陞山東左叅政捕蝗弭盜民德之二十七年內艱

二十八年陞雲南右布政使時普定曲靖烏撒烏蒙諸夷煽亂
迪率土兵擊破之捷聞賜金幣三十一年建文君即位改官制
定六部一品免尚書鄭沂等徵迪爲禮部尚書建文二年知貢
舉是年水旱有青集議迪言刑獄未清宜勅法司擇公廉仁厚
者分詣郡縣審覈獄囚無令久淹致傷和氣又言逃民家業既
喪且畏公私逋負失今不卹必嘯聚爲患宜使有司招徠其不
願歸者聽附籍種田暫免差徭則民安而盜息矣皆從之三年
加太子太師辭兼俸靖難兵起與黃子澄等上疏陳大計迪受
命督軍儲於外過家未嘗入聞變即赴京師 文皇繼統召迪
責問迪慢罵不屈與子鳳山丹山等六人同日就戮將刑鳳山
呼曰父累我迪叱勿言罵不絕口割鳳山等鼻舌燹熟食迪迪
吐唾益指斥遂俱凌遲死既死人于衣帶中得詩有曰三受天

王顧命新山河帶礪此絲綸千秋公論明於日照徹區區不貳
心又有五噫詞並悲烈蒼頭俠來保者拾其遺骸歸葬縣計家
橋洪武初詔釋迪宗姻戍邊者還鄉給產業成化壬寅郡人祀
諸鄉賢祠甲辰郡守涂觀復於迪故居立祠祀之後湮廢嘉靖
乙未驗封郎中李默謫判寧國復置祠祀郡人私謚曰靖獻默
文學才行表著一時仕至吏部尚書兼翰林學士丙辰春爲趙
文華所誣逮詔獄卒

刑部尚書侯太

侯太南和人累官至刑部尚書靖難兵起大督餉山東濟寧不
守輜輶陷沒還官建文四年又出淮安總軍餉得便宜行事
文皇即位太至高祖與謀上高茅卯仔同葬下錦衣獄是年
七月死弟敬祖子玘皆論死籍其家幼子京兒永樂九年上繫

錦衣獄

刑部尚書暴昭

暴昭山西人爲北平叅政時防藩府甚嚴未幾遷
 北平採訪使甫至境聞變亟走歸聞上建文元年
 司於真定陞昭刑部尚書掌司事平安諸兵敗召
 兵未城出亡被執見 成祖抗罵不屈去齒截手
 命侍郎克 平燕布政 京師靖難 馬不絕口

建文遜國臣記第二卷

臣學編第五十三

都指揮謝貴

海鹽鄭曉

謝貴未詳始所自起洪武二十五年以錦衣指揮僉事陞河南
 都指揮僉事未幾署山西行都司事二十八年坐趙隆事發當
 死 上特宥貴降河南衛指揮僉事建文君即位疑北平其部
 尚書齊太薦貴智勇以爲北平指揮使俾覘藩府令其練兵即
 有變先發後聞已卯六月貴部署北平七衛兵布城中逼王城
 盡柵端禮四門 文皇用張玉朱能計先擒貴貴死其盡散王
 等遂奪北平九門

都指揮彭二

彭二亦未詳始所自起建文初爲北平都指揮有威名靖難兵

起殺謝貴二急跨馬大呼市中集兵千餘人欲入端禮門文
早遣健卒龐來興丁勝格殺二兵亦散

都指揮馬宣

馬宣北平都指揮使靖難兵起殺張昺謝貴宣巷戰不勝東走薊
州起兵西逆戰遇靖難兵戰不利退守薊州出城再戰又敗被
執罵不絕口死之建文君褒恤宣家

都指揮朱鑑

朱鑑北平行都司都指揮守大寧靖難兵至大寧諸將陳亨房
寬皆降鑑力戰不支被縛罵不絕口死之建文君加恤典文
皇檄中所謂萬段凌遲處死者即鑑也

大寧守將卜萬

卜萬大寧大將也謀勇自負效死無恨每戰輒先登靖難兵畏

萬萬部將陳亨欲降燕畏萬不敢廢 文皇貽萬書咸稱萬堅
詆毀亨緘識牢密召所獲大寧卒解縛厚賞之置書衣中俾歸
密與萬故使同獲卒見之怪問守者曰彼何為得此守者曰遣
歸通密書於卜都司以故得厚賞卒跪告守者曰我得偕行請
惟命無庸賞我守者為請得俱遣竟不與賞不得賞者大志至
即發其事劉貞陳亨搜卒衣得與萬書遂疑萬執下獄籍其家
其間吳高亦類此未幾亨竟降貞遁遼東大寧相繼不守矣今
寧陽侯者即亨後也

都督廖鏞

廖鏞巢人祖永忠開國功封德慶侯父權嗣封鏞以適子任散
騎舍人歷官至都督建文中與議兵事時宿衛殿庭靖難後
上以廖侯兩子鏞與銘嘗受學方孝孺今召之孝孺怒曰汝讀

幾年書還不識箇是字兩子復命 上怒令軍校收孝孺孝孺杖衰經至闕下大哭 上益怒令以刀抉其口兩旁至耳刑之聚寶門外凡七日罵聲不絕廖兩子拾遺骸葬聚寶門外山上甫畢廖氏亦見收兩子遂逃去永樂元年四月錦衣鎮撫司奏獲鏞銘送刑部論死鏞弟鉞及從父淮安指揮僉事俱謫戍邊鏞母東甌王長女也并銘女送浣衣局

都督孫岳

孫岳洪武中從大將立功官至都督同知建文中克鳳陽守將朔難兵起大修戰守器械撤寺材爲戰艦樓櫓戈甲咸有法列寨淮西水陸有備靖難兵竟從下流渡淮至盱眙金川門不守尚猶堅守中都永樂元年法司劾其逮至京宥死安置海南

都指揮瞿能

瞿能不知何許人驍勇有名洪武中以四川都指揮使與同知徐凱統兵從涼國公渡大渡河擊西番有功又與都督徐司馬爲副總兵從總兵都督聶締討建昌叛酋月魯帖木兒已而改副涼國公監玉能破賊雙狼寒建文君即位從李景隆爲裨將二年四月庚申戰敗白溝河諸將皆狼狽走能父子獨力戰死之精兵萬餘人皆死或曰能通之子也

都指揮宋忠

宋忠錦衣衛指揮使智勇有名洪武二十九年百戶有論死者非其罪也忠疏救百戶御史劾忠 上曰忠率直無隱爲人請命何罪爲并宥百戶戍邊三十年御史劉觀劾忠作威福邀名譽調鳳陽中衛明年今羗將軍都指揮齊讓討西夷無功以忠爲叅將從征虜前將軍湯文討之凱旋復官錦衣視傳道四川

建文元年三月勅忠以都指揮總邊兵三萬屯開平蓋簡燕府護衛壯士從忠聽忠節制護衛胡騎指揮閔童者素驍勇忠遣童入京北平有未清左右衛左調屯彰德左屯順德都督徐凱屯臨清耿獻屯山海與忠相掎角約北平藩閔張昺謝貴長史葛誠爲內應 文皇殺昺貴誠起兵忠率兵三萬至居庸關不敢進退保懷來 文皇曰宋忠握兵懷來必爭居庸宜乘其未至擊之遂率精兵八千卷甲倍道趨懷來獲諜言忠諸將士家在北平者並爲燕府誅滅盡努力復家讐報國恩 文皇急令其家人張故旗幟爲先鋒呼其父兄弟相問勞家無恙輒喜罵宋都督欺我倒戈走中倉卒列陣未成 文皇一麾渡河大戰敗奔入城被執死之子謙鎮南衛指揮使靖難謫戍邊年十六死之

都指揮余瑱

余瑱北平都指揮使與謝貴密謀不遂貴死瑱走居庸關宋忠承制令瑱守關瑱簡練關卒得數千人將進攻北平 文皇曰居庸險隘北平之咽喉我得此可無北顧憂瑱若據此拊我背宜急取緩則增兵戍守後難圖矣令指揮徐安鍾祥千戶徐祥等擊瑱瑱且守且戰援兵不至棄關走懷來依忠忠兵又敗同被執不屈死之

都指揮彭聚

彭聚北平都指揮也與孫太副宋忠守懷來忠敗聚力戰死當是時諸將校爲靖難兵所俘者百餘人皆不肯降發憤死大半不可考矣

都指揮孫太

孫太都指揮使從宋忠戰懷來先登頗有斬獲靖難兵擇善射者並射太中矢流血被甲慷慨褰血力戰奮呼陷陣死之

都指揮莊得

莊得洪武末爲西京都指揮召至北平爲燕兵右翼出塞有功建文初隸宋忠麾下懷來之敗惟得一軍得全勝庸戰夾河得力戰助庸斬譚淵已而靖難兵勁騎乘暮掩擊得力戰死

都指揮陳質

陳質歷官江西都指揮使有威名建文初充叅將守大同尋陞中府都督同知發代府陰事代簡王獲罪靖難兵出懷來質以西師助宋忠忠敗退守大同靖難後被執不屈 上曰質好人害代王者遂被殺

都指揮楚智

楚智驍將也洪武中數從宋國公涼國公出塞有功歷陞都指揮使北平尋召入京從曹國公統騎卒遇靖難奮力戰夾河之後被執不屈死之

都指揮皂旗張

張皂旗者不知其名以都指揮克徧將力挽千斤每遇戰靖難兵輒揮皂旗先登軍中呼爲皂旗張轉戰山東屢有俘馘至夾河力戰死猶執皂旗不仆北軍皆異之

指揮王資

王資不知始所自起以指揮從徧將防守淮北資有膂力善騎射靈壁之役率步卒護軍餉諸將兵敗輜重芻糧委棄狼籍不能獨完遂被執遣還京遂走鳳陽從徐知府防禦靖難後追罪廢死

指揮宗剛

宗剛揚州衛世指揮其使同知僉事不可考矣建文物靖難兵起剛練兵繕濬城濠御史王彬倚任之兵至專以城守事屬剛晝夜不鮮甲同列懷貳心者忌剛畏彬不敢發及彬被執為徐政所縛張本又素不喜剛剛亦不屈而死

指揮趙諒

趙諒鄂國公外孫其母與孝康皇后兄姊也壯勇知兵建文元年六月以諒為留守右衛指揮僉事信任之諒能效職無私交未逾月靖難兵起諒時時奉密命往來諸將軍中督察之壬午秋常宗人並得罪諒亦坐廢憂懼卒

指揮宋瑄

宋瑄鄆國忠順公晟子也建文中為府軍右衛指揮使數從諸

將禦靖難兵有功靈璧之戰披甲躍馬先登斬首數級已而諸營兵敗瑄猶格鬪力屈死之靖難後晟功名大著封西寧侯卒求樂六年兵部上侯諸子孫名乞嗣封瑄子本晟長孫宜嗣上惡瑄令瑄弟琥嗣侯琥尚安成公主琥弟瑛尚咸寧公主琥罪廢瑛嗣侯沒於土木

指揮張倫

張倫河北諸衛指揮也勇悍負氣常喜觀古忠義事建文元年十二月薊州衛官起兵攻北平不克死倫聞之發憤合兩衛官各率其兵南奔結盟報國初從景隆已而從盛庸有功靖難後死之

衛鎮撫曾濬

曾濬薊州衛鎮撫與馬宣守州城靖難兵攻之不能下招之降

不肯輒出兵力戰兵敗為張玉所執不屈死之

衛鎮撫楊本

楊本中牟人或曰處州人初為太學生精於遁法建文元年十二月募才略之士本應募起家兵部試之授錦衣衛鎮撫時吳王撫軍一日本請王出觀兵及登前堂見大水森茫平階而一軍皆不見本曰此水遁也及帥師北向本常持一鐵棒重三十斤臨陣馳突北軍披靡不敢前遂破之景隆忌本不上其功已而本約日出戰諸軍為後繼景隆謂諸將曰今日譬之一園瓜我輩種得熟乃被別人採去耶竟擁兵不救本上疏畧曰形屬三千罪莫大於不孝人倫有五德莫大於盡忠忘君虐民者不可以不懲喪師失律者不可以不罪今都督袁宇與耿炳文征討喪軍七二十萬於燕地 皇上憐其為太祖故舊不忍加刑

又如魏國公徐輝祖征燕私存姪妹之情虧喪士馬 皇上召回京師命大教場操練軍士又曹國公李景隆四月進兵喪失軍馬無限 皇上責問乃歸罪群下此實總兵之罪也乞假臣為大總兵用能官一員召募義勇招撫軍伍凡先鋒叅謀軍政稽考等官臣自當保舉仍特命親王為監軍疾馳燕師則可免生民於塗炭奠宗社於泰山矣本遂帥孤軍獨出被擒繫北平獄後 文皇攻濟南失利趙王奔還北平恐人心動搖索本殺之 文皇大怒曰本有才略予且欲用本奈何殺之本頸後無髮力戰有功而爵賞不及

千戶倪諒

倪諒燕山左護衛千戶也上受害府中事府中官旗盡逮詔獄於諒周鐸皆伏誅沒產壯者戍瘴鄉幼者刺離間親王字克錦

衣鞍轡局幼軍靖難後諒死之

所鎮撫周拱元

周拱元沅州人少讀兵書出入辰沅壘中相交易壘人信之建文元年應募入京試騎射答策授錦衣所鎮撫軍前差遣占候

令別步兵防餉舟靖難後死

建文遜國臣記第三卷

吾學編第五十四

海鹽鄭曉

禮部侍中黃觀

黃觀字瀾伯一字尚賓貴池人初從父贅姓許幼敏穎受學元黃皞皞死節觀益自砥礪嘗築翠微書舍讀書洪武二十四年會試禮部第一廷對禦戎策大要以天道福善禍淫之機人事練兵講武之法為言擢進士第一授官翰林復黃姓累陞尚寶卿禮部右侍郎建文中改侍中掌尚寶司事與方齊並見信用文皇索齊黃時觀草詔極其詆斥建文四年觀奉詔募兵上游且督諸郡勤王至安慶聞交痛哭謂人曰吾妻翁有志節必不辱抬魂葬之江上明日家人自京奔至言翁夫人暨二女同被執有象奴得之索釵釧出市酒殺夫人急携二女率家屬十人

投淮清橋下死觀痛哭至李陽河建文君避位朝服東向再拜
投湍流中死籍其家并逮姻黨 仁宗初得釋柯暹為觀傳秘
不肯示人後三十年縣尹清江龔守愚於觀故址立祠祀之

吏部侍郎毛太

毛太不知何許人建文元年代王謙為左侍郎蹇義為右而紘
為尚書太文章政事皆優所與交者並中朝俊彥靖難兵起數
上封事條方略張紘死太亦死或曰即毛大亨也

戶部侍郎卓敬

卓敬字惟恭瑞安人生質秀敏孝弟七歲嬉戲相工曰此兒骨
髮殊異必為名卿惟血不華色耳年十五讀書寶香山風雨夜
歸迷失道路得一兒牛馬之歸北入門乃黑虎也洪武二十一
年進士除戶科給事中改元士尋又改為士源又復為給事中

時制度未備諸王服乘多僭敬乘間為言 上曰爾言是朕慮

不及此因陞宗人府經歷進戶部侍郎建文初燕王來朝敬密
奏曰燕王智慮絕人酷類先帝夫北平者強幹之地金元所由
興也宜徙燕封南昌以絕禍本夫萌而未動者幾也量時而為
者勢也勢非至勁莫能斷幾非至明莫能察建文君覽奏大驚
袖之翼日語敬曰燕王骨肉至親卿何得及此曰楊廣隋文非
父子耶建文君默然良久曰卿休矣事竟寢 文皇即位責敬
不奉迎乘輿敬厲聲不遜怒欲殺敬憐其才且繫獄或以管仲
魏徵事諷敬不聽姚廣孝惡敬必欲殺敬敬臨刑從容嘆曰變
起宗親略無經畫敬死有餘罪神色凜然經日猶如生夷三族
文皇嘗曰國家養士三十年惟得卓敬後四十年劉球傳其事
私謚曰忠貞敬立朝慷慨英偉美丰姿善談論凡天文地理律

曆兵刑皆能究察文詩峭拔磊落所著有詩文五十卷

戶部侍郎盧迴

盧迴浙江仙居人建文三年爲戶部侍郎迴疎爽不胥曲謹然大節皎然少喜飲酒飲酣輒長歌人或謂迴狂既仕顧折節恭慎靖難後不屈縛就刑長謳而死聞者悲之或曰盧珙

戶部侍郎郭任

郭任丹徒人或曰定遠人蕪慎有吏才仕至戶部侍郎調兵食軍興不乏靖難兵入金川門任不屈死之子經亦坐死少子金山保成廣西嘉靖中鎮江知府劉儲秀祀之鄉賢祠

禮部侍郎黃魁

黃魁不知何許人建文中爲禮部侍郎與陳迪黃觀共事魁行古雅有文學習典禮迪觀皆敬愛之靖難初魁不屈死之

兵部侍郎陳植

陳植廬江人元舉河南鄉試不仕洪武間起爲吏部文選主事歷官兵部侍郎靖難兵至植受命督師江上有督將密議降者植責以大義督將恨之遂遇害督將率衆奉迎自陳邀賞文皇立誅之具棺斂植遣官護喪葬于白石山植宗人大懼皆變姓名走匿無敢會葬者

兵部侍郎徐壘

徐壘字宗實黃岩人以字行聘授風紀官壘以草茅愚孱辭銅陵簿謫淮陰驛丞郡邑士多所造就召見獎諭屢聘主文衡陞蘇州通判擢兵部右侍郎疏請移整風俗罷去不急振舉廢墜裁定賦稅撫輯農桑開政教之路塞異端之源進賢退不肖靖難兵起奉使招集兩浙義勇明年建文君遜位去壘家覆沒於

京師皇義槩侃然杜門終老

刑部侍郎胡子昭

胡子昭字仲常一名子韶字伯尚大足人初名志高富經術性方介從學方孝孺漢中蜀獻王重子昭詩以明經儒士薦為柴縣訓導建文初陞翰林檢討又陞山東按察僉事進刑部左侍郎建文四年九月死之臨刑詩曰兩間正氣歸泉壤一點丹心在帝鄉時年四十一父復初母郭皆年八十餘并其子五人給緝繼等皆謫戍正德中巡按御史熊相立祠祀之

御史大夫練子寧

練子寧名安以字行新塗人洪武十八年進士父伯尚洪武間為起居注直言忤旨出為廣德州同知遷臨汀二府通判子寧初從鄉長者竹庄先生游命賦水竹村居詩曰千山暮雨石泉

通一夜春雷籜龍長與金少保相友善謂之曰異日子必為良臣我必為忠臣廷對言近日朝廷用人徇名而不求實小善驟進小過輒戮非育才用人之道剴切不顧忌諱 上親擢第二授翰林修撰未幾內艱杜門屏跡力行喪禮服闋復除翰林陞副都御史工部侍郎建文初即位改吏部與蹇義為左右侍郎又改御史大夫景隆奸邪懷異志屢敗召還子寧執景隆於朝數其罪請誅之不聽憤激叩首言此賣國賊臣備員執法不能除奸請先伏誅遂罷朝靖難兵既渡淮靖江府直史蕭用道衡府紀善周是修上書論大計指斥用事者誤國書下廷臣及兩人議用事者怒詬二人子寧曰事已至此尚不能容言者乎詬者愧而止 文皇即位縛子寧至語不遜斷其舌曰吾欲效周公輔成王寧手探舌血天書地上成王安在遂族其家姻戚逮

王學解
戊邊者百五十一人越數年吉水錢習禮以未及逮為鄉人所
持恒懷不安以告楊榮榮乘間以聞 文皇欣然曰使練子寧
尚在朕固當用之况習禮乎子寧所著詩文名金川玉屑集正
德中江西提學副使李夢陽為金川書院祠子寧刊其集行於
世

御史大夫景清

景清本耿姓真寧人洪武二十七年進士第二人倜儻尚大節
領鄉薦遊國學時同舍生有秘書清求而不與固請約明旦即
還書生且往索曰吾不知何書亦未假書於汝生念訟於祭酒
清即持所假書往見曰此清燈窓所業書即誦徹卷祭酒問生
生不能誦一詞祭酒叱生退清出即以書還生曰吾以子珍秘
太甚特此相戲耳初清赴舉時過淳化主家有女為妖所憑清

宿其家是夜妖不至去却復來文詰之曰避景秀才且日女以
告其父父追及清語之故清書景清在此四字令父歸粘於戶
妖遂絕不至清試禮部第三錄詩書二經入翰林三載改監察
御史三十年春召見嘉其材命署都察院左僉都御史與實俸
是夏臺臣鄧文鑑觀及清奏事罷以疏事訛懷印入刑科更
疏為給事中劾下詔獄尋宥之出川陝巡察私茶建文即位擢
左都御史大夫 文皇繼統方孝孺練子寧等死而清
獨委蛇侍朝人疑之一日早朝清緋衣入先是星者奏文曲犯
帝座甚急 文皇因疑清及朝清獨著緋遂收之得所帶劍詰
責不屈而死之是夕精英迭見族其家已而時入殿廷為厲又
命籍其鄉轉相攀染謂之瓜蔓抄村里為墟

都御史茅大芳

茅大芳太興人博學能詩文少有奇名或贈之詩曰陸機此日
能為賦賈誼何時復註書洪武中儒士應辟典教淮南考績入
朝高廟召對悅之擢秦府掌史勉以董子輔相之業賜賚甚
寵大芳感激額其堂曰希董方孝孺為記稱大芳志意偉然敦
大和雅不亢不誦深有得於正誼明道之旨建文君即位擢右
副都御史靖難兵起遺詩淮南守將梅賾幽燕消息近如何聞
道將軍志不磨縱有火龍翻地軸莫教鐵騎過天河關中事業
蕭丞相塞上功勳馬伏波老我不才無補報西風一度一悲歌
建文四年八月死之子順童道壽文生並論死二孫添孫歸去
死獄中有希董集五卷行于世

都御史陳性善

陳性善名復初以字行山陰人洪武十八年進士上見性善疑

重謂侍臣曰性善君子人授行人司副入翰林為檢討初誠意
伯劉基卒命李鐸往取其遺書基子璉即出觀象玩占石室中
從譯詣闕上之性善善楷書召入便殿繙錄上威嚴進見者惶
汗手顫不成字惟性善動止安雅書法端正上悅賜性善酒是
時威譴叵測性善留竟日家人以為死矣比出大驚喜久之超
陞禮部左侍郎薦薛正言輩雲南布政使韓宜可隸謫籍性善
薦起為副都御史皇太孫在東宮時熟聞性善名及即位一日
退朝獨性善賜坐問治天下之要且使手書以進性善感知
遇盡所欲言朝廷悉從之然施行未竟輒為有司所更性善請
見曰陛下不以臣愚猥承顧問臣既僭塵上聽許臣必行未幾
改所謂為法自戾何以信天下靖難兵起改性善為副都御
史監軍建文四年三月辛巳戰靈壁敗績與彭與明劉伯完王

貧皆被執 文皇縱之歸性善衣朝服躍入河死之後加追戮
家徙邊已而赦還

大理少卿胡閏

胡閏字松友鄱陽人博學修行高皇征陳友諒至鄱陽吳芮祠
見壁間題竹幽人無俗懷馬此蒼龍骨九天風雨來飛騰作靈
物 高皇問祠中人此誰詩也對曰里墟中儒生胡閏立召閏
見置帳前久之官督府經歷建文中以直諫知名遷右補缺尋
進大理少卿靖難兵起數與齊黃議軍國事壬午七月不屈死
之籍其家子傳道論死傳慶謫戍邊一文得釋歸貧甚無依樂
人競遺錢穀曰此忠臣女也旬日饑足嘉靖初提學副使邵銳
祠之學宮

太常少卿盧原質

盧原質字希魯初名質寧海人父中母方孝孺姑也洪武二十
一年進士第三人授翰林編修孝孺遺原質詩曰奉天殿上榜
初開共賀江南得秀才好與青蘿居士說今年文運屬天台二
十三年外艱賜傳奔喪二十八年陞太常少卿事建文君屢有
建白靖難後召見不屈死之族其家第原朴

太常少卿廖昇

廖昇襄陽人不知其所以進學行最知名與方孝孺王紳輩友
善洪武中為左府斷事 上知其賢二十九年六月擢太常少
卿建文元年正月勅修高皇實錄禮部左侍郎兼翰林學士董
倫右侍郎兼翰林學士王景彰為總裁官昇及翰林侍講學士
高巽志副總裁翰林修撰李貫國子博士王紳漢中府學教授
胡子昭齊府審理副楊士奇崇仁學訓導羅恢馬龍他即旬長

吾李維
遠國日記卷三
官司吏日程本立等纂修官昇博雅有史才明達負氣書靖難
兵事語多據實聞忠誠伯等自龍潭還慟哭與家人訣自縊死
都御史陳瑛奏昇黃觀王叔英周是修王良顏伯瑋皆不順天
命效死建文計其存心契叛逆等並宜追戮上詔勿問

大理寺丞鄒瑾

鄒瑾吉安永豐人洪武二十七年遇金華王紳紳稱瑾志篤才
敏議論磊落可喜忠義人也嘗遊成都都人士皆願與瑾交洪
武末薦至京建文二年爲大理右寺丞靖難後不屈死之或曰
四川江津人洪武中以經明行修薦起縣學教諭遷監察御史
歷陞都御史死建文時

大理寺丞劉端

王高

劉端南昌人建文二年進士驟迁大理寺丞廉明執法靖難後

與同邑王高並坐縱方孝孺息樹陰劓鼻而終高與端同年進
士又與端同官或曰高爲刑部郎中

大理寺丞彭與明

彭與明萬安人貢入太學洪武二十五年授兵科給事中陞刑
部浙江司員外郎建文元年陞湖廣按察司僉事尋陞大理右
寺丞與明廉勤律已剛毅敢言敏達能斷四年擇中朝官知兵
有風裁者出江北督察諸將與明爲衆所推遂出淮西至靈璧
會河復戰敗爲北兵所執 文皇遣歸令傳語中朝士與明慚
憤裂冠裳棄官變姓名

左拾遺戴德彛

戴德彛奉化人洪武二十七年進士第三人初爲翰林編修三
十年與張信並陞侍讀 上諭曰汝爲侍臣凡國家政治得失

生民利病當知無不言昔唐陸贄崔群李絳在翰林皆能正言
謹論補益當時汝宜以古人自期後改監察御史建文中省御
史改左拾遺靖難兵起與方黃畫兵事靖難後不屈死之

建文遜國臣記第四卷

吾學編第五十五

海鹽鄭曉

開國公常昇

常昇開平王仲子也兄茂洪武三年以父功封鄭國公二年從
宋國公馮勝出塞征納哈出茂本勝婿勝言茂驚潰納哈出衆
降人械送京師茂亦言勝短上召勝還奪總兵印罷朝請茂
安置龍州上念開平王功二十一年封昇開國公懿敬皇太子
妃昇姊也靖難兵至浦子口昇及魏國公分道出戰衆散金川
門失守昇見文皇得不死昇子繼祖坐事謫雲南臨安永樂
二年召至京賞鈔幣遣歸謫所繼祖六子長寧寧子復弘治五
年詔錄太廟元祀功臣後復得爲南京錦衣衛世指揮使卒子
經嗣老子鳳卒子玄振嗣嘉靖十年進劉基侑享太廟并議常

李鄧湯四王後十一年續封玄振懷遠侯

越嵩侯俞通淵

俞通淵父河間郡公廷玉兄號國忠烈公通海南安侯通源通淵以父兄故充參將侍舍人從大將軍征秦隴燕趙均陞督府僉事征哈喇哈至捕魚兒海獲酋長人畜尋轉餉江西克偏將征都勻龍場諸蠻克辰沅寶慶俘獲多封越嵩二十六年坐累奪侯還鄉建文元年召見上壯之曰老將也授豹韜衛指揮使克偏將從大將軍禦靖難兵敢戰有功白溝河之後諸將兵大敗通淵遂歿於陣子翊先卒次靖嗣官二年卒次端又明年優給錦衣未幾卒靖難後家人懼禍不敢言襲替事建文時諸將校多失世官也

駙馬都尉梅殷

梅殷歸德人汝南侯思祖從子洪武十一年尚寧國公主爲駙馬都尉恭謹有謀能騎射諸駙馬中高皇尤愛殷嘗受密命輔建文若靖難兵起殷充總兵官鎮守淮安悉心防禦文皇假道殷割使人耳鼻口授詞答文皇曰留汝口與殷下言君父恩義文皇竟不得道淮安乃渡泗水破盱眙出六合至京師即帝位殷尚擁重兵淮上上迫公主招殷公主嚙指血爲書付李中使至殷殷得書慟哭詢建文君所在中使曰去矣殷曰君存與存君亡與亡吾姑忍侯之乃還京見上上曰駙馬勞苦曰勞而無功末樂二年冬都御史陳瑛言殷招戡亡命私匿胡人與女秀才劉氏朋邪詛呪幾得罪明年冬入朝殷雙言家都督譚深指揮趙曦令人擠殷死笪橋下曦又誣殷自投水死都督許成發其事上怒罪深曦二人對曰此上命也柰何殺

臣上大怒立命力士持金瓜落二人齒斬之謚殷榮定初公主謂上果殺殷幸衣大哭問駙馬安在 上笑曰爲公主踪跡賊無自苦公主謹護二字順昌景福 上以順昌爲中府都督景福指揮旗手衛僉事二甥曰朕不念爾母爾安得至今日二甥後改孝陵衛指揮使宣德中與世襲孫純舉進士爲中都副留守或曰公主嘗貽書阻靖難兵 文皇不答兵至淮北與公主書言興師不得已故令遷居太平門外勿罹兵禍公主亦不答公主 高皇后長女后二女次適歐陽倫倫犯茶馬禁死

長興侯耿炳文

耿炳文濠人父君用取滁和積功爲管軍總管克來石取金陵丙辰與張士誠戰賈勇先登死炳文代領其軍明年取廣德長興擒士誠守將降其兵會立元帥府長興以炳文爲總兵都元

帥辛丑敗士誠將李伯昇追斬五千餘級拜指揮使吳元年破蘇州陞大都督府僉事洪武初授鎮國上將軍兼右率府副使二年陝西鎮守三年授秦王府左相兼陝西行省右丞封長興侯食祿千五百石與世券十四年破虜北黃河復還陝西二十四年賜鏹鈔造第鳳陽葺先塋贈君用爲侯二十五年兩當妖人作亂總兵討三年平之三十年克征西將軍勦平蜀盜三十一年鎮守遼東建文元年靖難兵起炳文爲征虜大將軍率衆二十萬北進至真定都督徐凱兵十萬駐河間都督潘忠楊松營漢州先鋒至雄縣 文皇出炳文不虞破其城忠松引衆來援伏兵起忠等皆被執因得炳文虛實遂長驅至真定張玉朱能譚淵來戰炳文大敗潰還滹沱河克炳文衆尚數萬復戰衆皆潰降副將駙馬李堅都督審忠顧成都指揮劉遂俱被執炳

文固守真定靖難兵攻城二日不能下而去炳文老將善戰至是敗建文君始有憂色召還遣李景隆代炳文竟至於亡未樂二年刑部尚書鄭賜左都御史陳瑛劾炳文衣服器皿僭飾龍鳳王帶僭丹鞋 上曰炳文先朝老臣亦爲此其速改炳文大懼暴卒洪熙初盡以長興侯田舍賜留守郭鑑云子璿璿別有傳瑄散騎舍人擢尚寶卿後皆獲罪死

駙馬都尉耿璿

耿璿長興侯之子洪武中爲前軍都督僉事尚懿文太子長女江都郡主建文元年郡主進封公主璿爲駙馬都尉掌前府事璿勇悍有武略靖難兵起以王室懿親得預聞兵事炳文北行璿力勸直搗北平已而炳文戰數敗璿怏怏抱病時對公主悲泣建文君遜去杜門稱疾竟坐罪死公主復稱郡主永樂九年

春憂卒

深城侯李堅

李堅武涉人父英開國有功爲驍騎右衛指揮僉事力戰死烏撒贈指揮使堅尚 太祖第七女大名公主爲駙馬都尉嘗與駙馬歐陽倫梅殷陸賢賑濟北平建文君即位進公主大長公主堅素負才勇克左副將軍從長興侯北進遇靖難兵諸將謹備西北靖難兵突擊出不意破西南長興侯大敗靖難將丘福又攻子城堅出接戰互有勝負封堅深城侯食祿千五百石與世券已而兵敗溲沱河薛祿引槊中堅墜馬祿揮刀直取堅堅大呼我李駙馬勿殺祿擒堅見 成祖成祖謂爾至親今至此柰何械送北平道卒子莊以公主故特宥當嗣公主懼禍繳誥券莊流寓南京詩酒終其身公主至宣德初卒或曰堅子莊嗣

侯謚威壯第成爲中都留守改山東都指揮成子陸世南京衛
指揮使祿後封陽武侯

安陸侯吳傑

吳傑黔國威襄公子也洪武十八年傑以指揮嗣封安陸侯屢
出山陝河南北平練兵從征胡二十七年練兵浙江防倭二十
八年有罪令與吳高皆從揚文征龍州立功自贖建文中率師
援真定矢律喪師謫南寧衛指揮使永樂元年子璟乞嗣正統
間再三乞皆不許弘治六年璟孫鐸授詔乞嗣亦不許

歷成侯盛庸

盛庸不知何許人靖難兵起充叅將從長興侯數失利長興侯
召還庸又從曹國公轉戰燕齊間互有勝負建文二年七月鐵
鉉守濟南靖難兵圍急庸夜出劫戰晝憑城禦防盡毀靖難諸

攻具捷聞即軍中陞鉉兵部尚書封庸歷城侯食祿千石克平
燕將軍總兵官代曹國公鉉叅贊軍務是年十二月戰東昌殺
張王三年三月大戰于夾河殺譚淵再戰敗走德州欲搗北平
靖難兵長驅至淮上四年春夏間庸南趨靈壁齊眉山戰皆敗
次於淮南六月靖難兵至浦子口庸出高資港又戰敗靖難後
勅庸曰比以山東未定命卿鎮守淮安今鐵鉉就獲諸郡悉平
朕念山東久困兵革憊于轉輸卿宜輯兵養民以稱朕意永樂
元年致仕千戶王欽發庸罪狀陸欽指揮同知賞銀百兩未幾
都御史陳瑛劾庸口出怨言懷異圖請誅庸遂削爵庸暴卒今
英國公新寧伯即淵後也

江陰侯吳高

吳高父良開國有功封江陰侯卒贈謚江國襄烈公高歷官前

軍署都督僉事洪武十七年嗣戾屢出山陝北平河南練兵從征胡二十八年有罪調征趙宗壽靖難兵起高總兵守遼東與楊文數以遼東兵攻永平 文皇曰高雖怯行事差密文勇而無謀去高文不足慮也遣人遺二人書盛譽高極詆文故易其亟投二人所二人得書並聞建文君竟疑高削爵徙廣西獨命文守遼東竟敗靖難後召高鎮守大同高上言禦虜方略永樂十二年被劾編氓江陰十七年奪券洪熙元年 上曰高往年多行無禮謫戍海南高即死徙其家會赦得釋宣德十年子昇乞嗣不許

都督耿璫

耿璫長興侯仲子累官至後軍都督僉事靖難兵起與江陰侯吳高及楊文率遼東兵圍永平不克退保山海關吳高被間奪

兵徙廣西楊文守遼東璫數請攻永平以動北平文不聽靖難後璫論死

都督劉貞

劉貞合肥人開國公累陞左軍都督克大寧總兵官修懷來城池改左軍靖難兵起貞及陳亨卜萬引大寧軍出松亭關苦沙河欲復遵化亨有貳心 文皇入大寧盡挫其軍以行遂入松亭關貞夜負勅印浮海歸時建文君聞行北平諸將降 文皇籍貞家下獄俄貞由海道出福建還京詔釋其家靖難後陞左都督鎮守遼東恒懷愧憤未樂元年卒貞長女 文皇昭順德妃也以故得免於禍次女伊王妃

都督趙清

趙清鳳陽人有膂力善用兵洪武中積功官至北平都指揮使

陸後軍都督僉事致仕清去北平時常懷隱憂不敢言靖難兵起黃齊諸人薦清帥河南兵守彰德靖難兵至城下遣人招清清對使人曰殿下至京城但出片紙召清清不敢不至今爲朝廷守封疆不敢棄命失職靖難後召清還清遂乞閑不許

都督楊文

楊文倉山人甲辰領神鎗從征功陞右軍都督僉事世指揮使二十二年總兵率舟師鎮守太倉仍督浙江海船召掌中都留守充總兵率十五萬人征廣西築城設奉議南丹潯州慶遠四軍民指揮使司三十年遼東練軍屯田充總兵征虜前將軍率京師湖廣江西兵征五閩擒殺蠻賊建文初充總兵部署大寧兵及寧府護軍屯開平靖難兵起宋忠敗文移守遼佐吳高時出兵擾北平吳高削爵徙廣西文專領遼東建文三年冬文

引兵萬餘掠薊州殺戮極慘遇劉江兵戰敗指揮王權七十一人皆被執靖難後召文還憐其開國老将得不死永樂四年卒世羽林右衛指揮使

都督徐凱

徐凱合肥人開國功爲茂州衛指揮使守松潘累立戰功洪武二十六年出掌鹽井衛事征賈哈刺有功又從西平侯沐春討刁幹孟歷陞都督僉事鎮守四川階文官軍叛會都督寧正討平之又充征虜大將軍從沐春討刁幹孟有功建文元年從大將何福征百夷爲副總兵靖難兵起從宋忠北進練兵臨清二年十月吳傑平安守定州盛庸守德州凱及陶銘城滄州爲犄角文皇自通州直趨滄州凱大戰不勝入城東門之卒先潰凱及都督程暹都指揮俞琪趙許胡原李瑛張傑將校百餘人


皆被執 文皇飲凱等酒遣歸凱等謝願留事殿下遣至北平
仍其官祿靖難後暴卒建文數年間諸將被執者無慮千人已
卯懷來之戰都指揮俞瑱真定之戰都指揮劉燧白溝河之戰
都指揮何清滄州之戰暹琪許原英傑德州之掠千戶蘇嚙辛
已澤沱河之戰指揮鄧戩陳鵬真定之圍都指揮朱榮定州之
戰都指揮花英鄭奇王恭指揮詹忠壬午渡衡水指揮賈榮拔
東平指揮詹景拔汶上都指揮薛鵬渦河之戰胡騎都指揮林
帖木兒火耳灰哈三帖木兒婁鬼里淮河之戰守將丁良朱彬
指揮王貴等一百八十餘人

建文遜國臣記四卷

終

子履準校正






17

T 2720/8261

Harvard College Library/Imaging Services <http://imaging.harvard.edu>

CM	0	1	2	3	4	5	6	7	8	9	10	11	12	13	14	15	16	17						
Lab D50 2'	95/0/2	81/0/0	66/0/0	51/0/1	35/0/0	20/0/0	29/19/-54	55/-39/33	42/57/29	82/4/79	51/50/-13	50/-28/-29	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68



建文遜國臣記第五卷

吾學編第五十六

海鹽鄭曉

翰林修撰王叔英

哈佛大學哈佛燕京

王叔英字原采黃巖人初從外姓陳篤志力學洪武中與楊太
 中葉見太方孝孺林右並徵至京辭還鄉二十年薦起家仙居
 訓導三十年改海安府學陞漢陽知縣建文元年孝孺欲復井
 田叔英貽書力阻之其略曰天下之事固有行於古而亦可行
 於今者亦有行於古而難行於今者夏時周冕之類此行於古
 而亦可行於今者也井田封建之類可行於古而難行於今者
 也可行者行之則人之從之也易難行者而行之則人之從之
 也難從之易則民樂其利從之難則民受其患此君子之用世
 貴得時措之宜也召為翰林修撰上資治八策曰務問學曰謹

吾學編

建文遜國臣記第五卷

好惡曰辨邪正曰納諫爭曰審才否曰慎刑賞曰明利害曰定
法制皆援証今古可見行事又曰 太祖除奸剔穢抑強鋤梗
如醫去病如農去草去病急或傷元氣去草嚴或傷禾稼是故
軀膚病去則宜調養其血氣禾稼草去則宜培養其根苗靖難
兵至淮上游兵逼江干建文君遣使四出募兵叔英奉詔行至
廣德聞建文君遜位慟哭會齊太奔叔英曰太貳心矣急擒太
至密問之故乃相抱慟哭與太且啻後舉已而知事不可爲沐
浴衣冠書絕命詞歲裾間自縊於玄妙觀銀香樹下詞曰人生
穹壤間忠孝貴克全嗟余事君父自省多過愆有志未及竟竒
疾忽見纏肥甘空在案對之不能嚥意者造化神有命歸九泉
嘗念夷與齊餓死首陽巔周粟豈不佳所見良獨偏高蹤邈難
繼偶爾無足傳千秋史官筆慎勿稱希賢又題其案曰生既久

矣未有補於當時死亦徒然庶無慚於後世 文皇登極治奸
黨妻金安人繫獄死二女赴井死叔英將死遺書祠山道士盛
希年葬我祠山麓希年天台人收葬叔英墓在州城西五里許
正統中楊士竒題其墓曰嗚乎翰林修撰王原采之墓士竒本
叔英薦起也成化中州守莆田周瑛植表識其墓嘉靖中編修
安福鄒守益謫州判官立祠祀之太平知縣曾才漢又建忠節
祠祀叔英妻及二女有貞烈祠在黃淡畧上叔英著于有靜學
集

翰林編修王良

王良字敬止吉水人建文元年江西發解第一明年舉禮部廷
試策最優以貌不揚易胡靖第一良次之又次李貫並授翰林
修撰如洪武十八年故事良初聞靖難兵起輒憂不食日齋億

又渡淮閉門涕泣不已訣妻子服毒死建文君哀其忠遣禮部
侍中黃觀諭祭或曰 文皇繼統前一日群臣迎附良慟哭不
已與妻子訣吾不可復生豈能復顧汝等是夜服腦子死此說
非是靖貫皆事 文皇永樂初上出建文時群臣封事千餘通
令解縉等編閱留軍馬錢糧數盡焚諸言語干犯者因從容問
貫縉等曰爾等宜皆有之衆未對貫獨頓首曰臣貫等實未嘗
有也上曰爾以是爲美耶食其祿思任其事當國家危急時官
近侍獨無一言可乎朕非惡夫盡心於建文君者但惡導誘建
文壞祖法亂政耳爾等前日事彼則忠於彼今日事朕當忠於
朕不必曲自遮蔽也後貫迂中允坐累繫獄十年竟死獄中貫
亦吉水人

翰林編修程濟

程濟朝邑人以明經爲 岳池教諭岳池去朝邑數千里濟寢食
在朝邑而治岳池學事不廢建文初上書言某月某日西北兵
起朝廷謂非所宜言驟 至京將殺濟召入仰面大呼曰陛下且
囚臣至期無兵臣死未 晚遂下獄已而兵果起救濟以爲翰林
編修充軍師護諸將北行徐州之捷諸將樹碑叙戰功及統軍
者姓名濟一夜往祭碑人莫測其故後 文皇過徐見碑大怒
率左右鐵椎椎碑再推遽曰止止爲我錄碑文來已而按碑族
之諸將無得脫者濟姓名正椎脫處得免濟曩之祭禳碑也淮
上諸將敗建文君召濟還京初濟與邑人高翔並以明經徵翔
厲名節濟好術數翔止濟勿爲此濟不聽已而有兵事濟又勸
翔學我術翔曰我願爲忠臣也金川門破翔招濟同死濟曰我
願爲智士也翔竟死之建文君急召濟入問計濟曰天數已定

惟可出走免難耳立召僧爲建文君落髮濟從之出每遇險幾不能脫濟以術脫去相從數十年後隨建文君至南京人尚識濟至京莫知所終

衡府紀善周是脩

周是脩名德以字行江西泰和人少孤力學舉明詩爲霍丘學訓導入見高帝問家居何爲對曰教人子弟孝弟力田高帝喜擢周府奉祠正逾年從王北征至黑山還陞紀善建文元年王有過盡逮府吏詔獄是脩以嘗諫得免改衡府紀善衡王者建文君弟也當是時衡王未之國是脩留京預修纂翰林好薦達知名士數陳論國家大計及指斥用事者誤國用事者怒衆共挫拆之是脩屹不爲動靖難師渡江宮中自焚是脩留書其家別友人江仲隆解縉胡靖蕭用道楊士奇且付後事暮入

應天府學自縊死年四十九文帝繼統都御史陳瑛言是脩不順天命請加追戮上曰彼食其祿自盡其心勿問是脩內貞外和孝友忠信非其義不苟取祿懷坦明灑落而冲澹悠然其學自經史百氏下至陰陽醫卜靡不通究爲文未嘗締思援筆立就而雍容雅贍詞理條達所著有詩小序詩集詩譜論語類編廣衍太極圖經常懿範通言家訓荀堯集進思集嘗曰忠臣不以得失爲憂故其言無不直烈女不以死生爲慮故其行無不果因取先忠節遺事輯爲觀感錄朝夕省改士奇嘗爲是脩傳語其子曰當時我脫與若父同死今誰爲若父傳者

給事中陳繼之

陳繼之字莆田人建文二年進士爲戶科給事中言江南僧道多用腴請人給五畝餘以賦民從之靖難兵起建白多不

遜靖難兵入滅死之繼之父秀母黃請戍甘肅道死子微仔妻
姚女進奴京奴沒宮弟余朔等悉邊戍

給事中韓求

韓求西安人或曰浮山人不知始所自起建文時爲戶科給事
求豐軀美髯音吐宏朗每慷慨論兵事建文君喜之靖難後杜
門不出召入見不屈死之

給事中黃鉞

黃鉞字叔揚常熟人以生員薦除宜章典史建文元年舉湖廣
鄉試明年進士授刑科給事中陞戶科左改禮科建文三年外
艱方孝孺屏左右問曰北兵日南蘇常鎮京師左輔君吳人朝
廷近臣今雖去宜有以教我鉞曰二郡惟鎮江最要害守非其
人自撒籬籬也鎮江指揮童俊狡猾不可測蘇州知府姚善忠

義烈有國士風能當一面但仁慈有餘而御下太寬此治郡
之良才恐不足定亂然國家大勢不在江南戎馬至此而禦之
晚矣孝孺因附書善勉以忠孝期戮力王室濟時艱善得書與
鉞相對慟哭以死自誓鉞就父殯居陂上舊廬足跡不入城邑
靖難兵至江上善受建文君詔總督蘇松常鎮嘉興五郡兵勤
王以書招鉞鉞即日營葬畢遂至善所時俊果以鎮江降靖難
後詔暴善罪捕善急善麾下許百戶素權詐得親善縛善邀賞
鉞聞之慟哭遂絕食閉目三日求死家人救免或告鉞曰善款
服已得有鉞即瞠目曰吾知善決無二心吾且少俟善事定吾
獨死未晚脫鉞果不死吾將下報希直遂復稍稍食是年七月
十一日善死報至鉞起登琴川橋西向再拜祀善慟哭曰吾與
君同受國恩國有難義同許身君今與希直同死國吾忍獨生

乎祀畢詒家人歸祭具遂從容整衣冠奮身入水死時北兵四出捕善黨籍籍言且併錄鉞家親族悉驚伏鉞友人楊福具棺衾日夜泣橋側百方求鉞死不得更數日屍忽自出立水中福痛哭抱起易衣躄猶不潰竟成禮葬之異處福父深早奇鉞鉞與福共學福亦有古行

給事中龔太

龔太字叔安義烏人九歲而孤母傅躬教之遣就外傅日記數千言長自刻勵造詣深邃洪武十九年鄉薦明年入太學奉旨閱齊府獄監安東倉盡力剔抉吏部策試第一除戶科試給事中建文三年遷都給事中 文皇渡江太與妻傅訣曰事至此我自分死爾第携幼穉歸否則俱溺并無辱俄宮中火起太馳赴為兵校所執見 文皇金川門以非奸即得釋太自投城以

死年三十六太遇事剴果有為以孝友聞任人擠太池溺幾死閱其病狂弗校鄉有巫言人禍福輒驗太至不能出 語于來官兵部右侍郎改南京大理致仕

監察御史曾鳳韶

曾鳳韶廬陵人洪武末年進士建文初為監察御史會藩王入覲馳皇道入且不拜鳳韶侍班言殿上宜展君臣之禮宮中乃叙叔姪之倫由皇道不拜大不敬建文君曰至親勿問靖難兵起鳳韶使北平請罷兵歸國不報靖難後召復御史不至尋加侍郎召又不至刺血書憤詞襟上曰予生廬陵忠節之邦素負剴鯁之強讀書而登進士第仕宦而至繡衣即既一死之得宜可以含笑於地下而不愧吾文天祥屬妻李子公望曰我死勿易衣遂自殺時年二十九李亦守節死

吾學錄 卷五
監察御史董鏞

董鏞或作庸不知始所自起亦不知何許人建文時爲監察御史諸御史有志節效忠不朝者時時會鏞所誓不負此心將校懷貳不力戰者輒露章劾之靖難後爲衆所持謂鏞逆黨也論死家徙戍邊

監察御史葉希賢

葉希賢監察御史也或曰浙東人或曰起家鄉薦入臺侃侃自負建文中屢疏言用兵事又嘗耿李二大將失律金川門失守又詐藩守門者靖難後坐逆黨死之

監察御史魏冕

魏冕吉安永豐人建文時爲監察御史勁直有才名靖難兵至有約開門者冕率同僚十八人即殿前毆之幾死會輟朝冕及

鄒瑾大呼請速加誅臣等義不與此賦同生不聽明日宮中大起或謂冕宜急迎附冕教已厲聲曰使吾改臣節必不爲時不用奈何徒自壞也靖難後冕自盡法官請追罪夷其族

監察御史王度

王度字子中歸善人少肆力學問通經史能文學爲鄉里師以明經儒士薦起家爲山東道監察御史有風裁疏十餘上多見采行靖難兵起度與齊黃等調兵食建文二年監會試時李景隆累敗保退濟寧以誠肅代之總兵度密陳便宜有東昌之捷徵景隆還不誅反用事忌庸并譏度度稍踈斥三年夏靖難兵南下益急度請募兵未幾有小河之捷勅度勞軍徐州北還鳳陽失守方孝孺與度書誓死社稷四年秋七月謫戍賀州坐語不遜夷其族卒年四十七

監察御史甘霖

甘霖懷寧人洪武丁卯鄉薦為監察御史劾介持正敢言中臺推重之靖難後被執求死從容受戮子孫相戒不復求仕至今微弱正德中知府胡縉宗祀之鄉賢祠

監察御史高翔

高翔朝邑人有文學矜名節洪武中明經徵為監察御史諸所論奏皆國家機要常上心建文時尤戮力戎事相與激發忠義靖難後上召翔翔服喪服入見大哭語又不遜遂族翔沒其產諸給高氏產者皆加稅曰令世世罵翔也親戚悉戍邊又發其先墓雜犬馬骨焚灰揚之而以其地為漏澤園

監察御史王彬

王彬字文質兗州東平人洪武中進士起家為御史巡江淮治

揚州靖難兵至彬與指揮崇劄共守揚城指揮王禮欲舉城彬與劄知之執禮及其黨繫獄彬外禦內防七日不解甲有力士能舉千斤彬常以白隨靖難兵飛書城中有縛王御史降者官三品左右憚力士莫敢縛彬禮弟宗厚賂力士毋誘其子出會彬解甲浴盤中為千戶徐政張勝所縛昇至城上投靖難兵中不屈死之政遂出禮築于獄與江都知縣張本開城門降正德中揚州祀彬名宦

監察御史鄭公智

鄭公智字叔貞台寧海人力學好古工文辭方孝孺薦之蜀獻王召至成都王與語經史論詞藝公智數稱述河間東平賢行王說之建文初侍孝孺至京尋身良為監察御史吏事精敏持法不阿靖難後坐方黨論死

監察御史韓郁

韓郁未詳何許人爲監察御史建文中上書言諸王親則太祖遺體貴則孝康皇帝手足尊則陛下叔父使二帝在天之靈子孫爲天子而弟與子遭殘戮其心安乎臣每念至此未嘗不流涕也此皆豎儒偏見病藩封太重疑慮太深而至此夫唇亡齒寒人人自危周王旣廢湘王自焚代府被推而齊臣又告王反矣爲計者必曰兵不舉則禍必加是朝廷執政激之使然燕舉兵兩月矣前後調兵不下五十餘萬而一矢亡獲謂之國有謀臣可乎經營已久軍輿輒乏將不效謀士不効力徒使中原無辜赤子困於轉輸命不聊生日甚一日九重之憂方深而出入帷幄與國事者方且洋洋自得彼其勸陛下必削藩國者果何心哉諺曰親者割之不斷疎者續之不堅殊有理也陛下

不察不待十年悔無及矣臣至愚感恩至厚不敢不言幸少再洞鑑興滅繼絕釋代王之囚封植襄王之墓還周王于京師迎楚蜀爲周公俾其各命世子持書勸燕罷兵守藩以慰宗朝之靈明詔天下揆亂反正篤厚親親宗社幸甚不聽郁未詳其所終

參軍斷事高巍

高巍遼州人事母蕭至孝蕭老而痼疾巍奉湯藥不懈母亡廬墓蔬食三年洪武十五年應貢入太學十七年以孝行旌尋授前軍督府試左斷事十八年上疏欲墾山東河南北平兵後荒田及抑末技慎選舉惜名器數事上嘉納之後坐斷事不稱旨當罪以議賢謫戍貴州閩索嶺仍許姪代後建文君即位上疏臣乞歸田里未幾知州王欽應詔辟巍赴銓曹上書論政事

其一曰 太祖有文王純一之德皇后有后妃不妬之行百男
君王上齊三代分茅胙土先據形勢陝西百二山河其人悍勇
西隣土蕃故以藩王之長秦府王之山西表裡山河地產良馬
其人剴壯所謂山西將者是也北近胡虜故以晉王府之燕國
雖無名山大川之限其南冀州真保順平大名諸府所謂桑土
之野地理坦平肥沃供賦饒衍北雖沙漠不毛廣蓄馬羊其人
不耕不蚕皮衣肉食弓馬是務遼金殘元藉之與業故以燕府
王之四川雖曰西南一隅山河阻深玄德諸葛虎視吳魏故以
蜀府王之其餘楚襄齊充寧遼谷代慶肅星羅碁布比之古制
雖皆分封過當然 太祖聖意莫不欲護中國而屏四夷也今
各處親王故多驕逸不法違犯朝制者不削則朝廷紀綱不立
削之則傷親比之恩此我 皇上所難處也賈誼曰欲天下之

治安莫要於衆建諸侯而父其力力少則易使以義國小則無
邪心真裁制諸侯之良策也以臣愚見莫聽晁錯削奪之策當
行主父偃下推恩之令秦晉燕蜀四府子弟分王於齊充吳楚
潭湘齊充吳楚潭湘分封於秦晉燕蜀其餘寧遼谷代慶肅等
府類比而分王之少其力而減其地如此則藩王之權不削而
自弱矣其賢如河間東平下詔褒賞驕逸不法如淮南濟北者
初犯則容之再犯則赦之三犯而不改者當合親王告太廟削
其地而廢處之豈有不服順者哉修身齊家宣父明訓睦族和
邦帝堯盛德惟 皇上覽察焉建文君竒觀會靖難兵起命從
李景隆出師參贊軍務親復上書言臣願使燕披忠膽大陳義
禮曉以禍亡及親比之誼遂遣往燕魏自稱國朝處士臣某上
書燕國大王其詞曰志慕仲連子善與人排難解紛名世不朽

我太祖升遐遺詔內外臣民同心輔政我聖明天子嗣登寶位誕布維新之政下養老之詔天下感戴奚啻考妣朝野皆曰內有聖明君王外有骨肉藩翰帝王之治可待不意大王與朝廷有隙張皇三軍抗禦六師竟不知其意何出在朝諸臣執言仗義以順討逆臣以為動于戈孰若和解使帝者復帝王者復王君臣之義大明骨肉之親愈厚臣所以得奉明詔置死度外來見大王欲盡一言求頸血汚地者稱臣宿許太祖生當殞首死當結草之願也昔周公聞流言即避位居東若大王始知謀逆者擒送京師或戮而奏聞或解其護衛或質所愛子孫什骨肉猜忌之疑塞諛賊離間之口不與周公比隆哉慮不及此遂檄遠近大與甲兵襲疆宇任事者得藉口以為殿下假誅左班文臣實欲效漢吳王倡亡國以誅晁錯為名家必自毀然後

人毀之恐一奸雄豪傑殲集無賴因時乘釁率眾數萬突起而橫擊之萬一有失大王獲罪先帝失今大王據北平取密雲下永平襲雄縣掩真定易石建瓴但自興兵以來今經數月尚不能出區區最爾一隅之地較以天下十五而未有一焉大王將士殆一疲矣况朝廷天下無限之師大王以一國有限之眾應之大王同心之士大約不過三十萬大王與我聖天子義則君臣親則骨肉尚生離間之疑况三十萬異姓之士可保終身困迫而死于殿下乎大王信臣言上表謝罪按甲休兵朝廷寬宥再修親好天意順人心和太祖在天之靈亦安矣不然執迷不回僥倖恃事恐與伯夷叔齊泰伯仲雍求仁之國之義經庭矣幸而兵勝得成後世公論為何倘有蹉跌取譏萬世於是時也追復臣言可得乎魏白髮書生蜉蝣微命死生不懼者但久

蒙 太祖教養無能補報洪武十七年旌表愚臣孝行臣竊自
負既為孝子當為忠臣死忠死孝臣至願也書再上不報景隆
兵敗魏自投南歸建文二年五月遇鐵鉉於臨邑相持慟哭其
誓效死遂趨濟南守城拒退靖難兵魏賦志喜有曰至濟南而
被圍思張巡之忠堅幸遇知己之鐵相與從英輩以雲聯若徐
將軍之赴赴盛統兵之桓桓愈憲高公之計謾大叅宋公之周
旋掠陣張都統之能勇給師王太守之從惟吾道王府校之論
議斯文王旨播之勉旃衆賢群策出力保全盛統兵者盛庸也
餘不可攷矣京城破魏縊元驛舍又有高不危者仕建文時死
義弟宣戍南海衛或曰不久魏字也

行軍斷事錢芹

錢芹字繼忠吳人少好奇竒元末以策干諸將不遇洪武初辟

人郤督府掾從中山王出北平絕漠而還木幾解職家居二十
餘年甘貧樂道姚太守虛心求見芹授一冊竟不交一言而退
冊中言勤王事不知其詳也建文君求直言舉山林岩穴懷才
抱德之士善薦芹吉安知府薦請用道用道授靖江府直史芹
為戶部司務留中議事尋著行軍斷事從大將軍諮議軍事會
龍芹入奏事道病卒猶條其事緩忌上執政年七十二賜棺歛
歸葬黃山善後竟勤王

戶部主事巨敬

巨敬平涼人初為監蔡御史伉直敢言建文中為戶部主事清
慎有聲靖難後被逮責問不屈死之夷其族

國子博士黃彥清

黃彥清不知何許人亦不知仕何官建文四年十二月彥清尚

爲國子博士以在駙馬都尉梅殷軍中私謚建文君坐死并遣
從子貴池典史金蘭等繫獄殷言多清實不在軍中金蘭等得
釋金蘭後官至知縣南京故老言建文已卯庚辰間法網疎濶
道不拾遺有得鈔於衢者輒拂其塵土置高潔處以石鎮之而
去一時士風朴實尚義者多靖難兵入京之夕卽御史給舍四
十餘人相與縋城遁去詰朝御史以聞、文皇不問已而深山
窮谷中往往有傭販自活禪寂自居如所謂雪庵和尚者其志
蓋可悲云或曰黃彥清中大臣出外巡訪、文皇詔至拒不受
欲面與復下皆効命顧兵力不足死之或曰王訛爲黃

宗人經歷宋徵

宋徵不知何許人爲宗人府經歷建文時上䟽請削罪廢宗藩
屬籍諸王聞之皆恨徵又嘗與盧振謝昇牛景先數言耿曹

諸將失律懷貳心靖難後縛至不屈死并殺其妻子

欽天監副劉伯完

劉伯完不知何許人洪武時重天宮之學稍通曆象占布風角
者咸得衣食於宮凡有征討必選通知天文者從行伯完精於
占候又諳回回曆法起疇人歷官欽天監副靖難兵南下至歷
城侯軍中從何福戰靈璧敗績被獲釋還竟亡去莫知所終

按察使王良

王良字天性祥符人歷官刑部左侍郎建文三年問燕國人罪
從末減左遷浙江按察使至浙江謁岳鄂王墓誓曰苟愧武穆
非人也建文君遜位大勸九月詔召良良集集司諸印私第躡
蹻未能決妻問故曰我分應死未知所以處汝耳妻曰我何難
君爲男子乃爲婦人謀乎遂愧良食抱其子歛戲如廁置其子

池旁自投池死良殮妻畢即列新于戶寫遺囑付家人令妾抱
幼子往匿某僉事家或曰託諸汴商遂舉火闔室自焚死事聞
上曰死本良分也朝廷印信良不得輒毀良毀印不得無罪徒
其家於邊台人陳燧私識良死事每談及流涕沾襟正德戊寅
浙江按察使梁材提學副使劉瑞改公署為東水鑑亭為祠祀
良

叅政鄭居貞

鄭居貞徽州人或曰閩人父潛國初歷仕潞州同知居貞豐頰
美姿鬚從父官閩中因從貢尚書遊洪武中以明經舉授鞏昌
通判陞禮部郎中建文時為河南試左叅政三年吏民信愛之
永樂初坐方黨死于南京有閩南集閩隴行藁歸來藁隨藁檜
廷藁子孫因留居福州永山方孝孺之為漢中教授也居貞嘗

以詩送之曰
上紫鳳雛羽翮備五彩徘徊千仞翔餘音播江
海於焉覽德輝濟上鏘環佩天門何差我群山久相待晨沐晞
朝陽夜息飲沆瀣如何復西飛去去秦關外岐山諒匪遙啄食
良自愛終當朝阿閣庶以鳴昭代

按察副使程本立

程本立自原道系出伊川上世徙杭再徙崇德今析同鄉本立
少有大志讀書不務章句與海鹽沈壽康友善壽康喪父母塋
祭以禮敦行詣南臺論薦與官力辭不就鄉人稱為孝隱先生
嘗執手告本立曰世之學者爭務科舉以經學為名而無實吾
所不取子之質近厚年且富上志於聖賢之孝本立遂篤志修
檢就學金華朱克修寓金華最久造詣益深國初舉明經秀才
洪武九年除秦府引禮舍人同秦晉燕府官僚召見奉天門賜

馬楮幣母艱去官十三年補周府禮官從王之國大梁二十年
春進長史從王來聘被累謫雲南馬龍他即甸長官司吏目留
家大梁從一僕去雲南會死可伐煽誘百夷為逆三十一年本
立單騎入夷巢諭順逆利害諸酋落咸感說歸附是冬諸夷復
變帥潘沐英張鳩屬本立行縣典兵事且撫且禦本立誓以死
濟萬民不避險難山行野宿自楚雄姚安抵大理永昌鶴慶麗
江往來綏輯民夷稍安二十五年英卒本立為文祭莫英宗人
重本立請本立撰碑記述英功德三十一年奏計入京還鄉應
天府尹向寶翰林學士董倫薦本立學行政事宜留中朝徵入
翰林充纂修官修 太祖實錄未幾陞試左僉都御史授四品
散官食正七品俸建文三年坐失陪祀調降暫留翰林編纂明
年實錄成改江西按察副使未至江西聞靖難兵入城自縊死

本立所著有巽隱集後百三十年福建布政使吳昂刻於闕
康洪武庚戌旌表孝子知縣王文禮敬之

按察僉事胡子義

胡子義一名志遠刑部侍郎子昭弟也薦辟為威遠訓導歷蜀
府典實山東按察僉事聞兄死辟世丹稜蜀獻王聞而憐之令
削髮為僧子義以親遺躰辭有子二人生數歲子義曰吾兄無
後天不絕吾姓二子當免於難竟棄去莫知所終

按察僉事林嘉猷

林嘉猷名昇以字行台寧海人師同邑王琦琦坐累徙雲南嘉
猷徒步千里追別又行六千里至漢中師方孝孺孝孺得嘉猷
鄭叔貞喜曰匡我者二子也洪武二十九年以儒士校文四川
蜀王訝其名字不相蒙更名良顯薦入史館為史官累遷陝西

按察僉事嘗被召入燕邸最久知二郡王素傾世子以告孝孺
建文君遣錦衣千戶張安持書詣燕許世子王燕燕內使黃儼
因問世子計且得行世子竟先發事遂洩靖難後坐方黨逮至
京建文四年九月丁亥死之

知府葉仲惠

葉仲惠初名見以字行臨海人與兄見太夷仲並有文名稱二
葉惠仲初任廣武衛知事陞知縣建文初以知縣充史官修
高廟實錄二年同考禮部陞知府永樂元年二月坐修實錄時
書靖難其爲逆黨論死籍其家時年六十四

知府王璉

王璉字器之日照人通經史尤長於春秋初仕教授坐謫洪武
末以賢能薦授寧波知府潔廉平易杜私謁革吏弊政教蕪舉

璉自奉儉約一日見饌魚肉大怒命撤而瘞之號埋羹太守
惟痛絕豪武人以故衛吏卒恨璉靖難兵至江上璉造舡取海
道勤王爲衛吏卒縛至京見文皇文皇問造舟何爲璉徐對
曰由海道趨瓜州截路耳文皇亦不怒釋還田里鄞州黃孝
憲潤玉贊璉曰富貴不淫患難矣恤神明其心始終一德

知府姚善

姚善字克一安陸人初姓李後復姓居魚寨善志行淳實孝識
高遠爲書生時扁讀書所曰待旦軒會稽唐之淳爲之銘善工
詩爲唐相唱和洪武中鄉舉歷祁門丞同知廬州重慶所至有
能聲三十年擢蘇州府初上以吳民染夷俗僭靡違式繩以
重法囂訟者更持短長訟蜂起難治善洞達政躰周悉人情張
弛寬密允協時宜數造請郡賢考求治道商略民生休戚俗尚

淳漓稍因俗救正吏民回嚮轉稱大治爲列郡最隱士王賓居陋巷善往候舍車詣門賓問爲誰曰姚善賓乃開門延諸及賓報謁面府門再拜而返善自邀還辭非公事不敢入又將候韓奕奕避入太湖善嘆曰韓先生可謂名可聞而面不可見者錢芹自守甚高善願見不可得有俞貞木者以明經見重於善月朔望必延致學官講經書訓士一日饋菜於貞木誤送芹所芹受之吏覺其誤詣貞木以告貞木曰錢先生不苟取與今受不辭必仰府公之賢耳善聞之欲往候乃使人先道意芹對使者曰芹誠願見公然芹民也禮不可往見于庭若明公弘下士之風請俟月朔相會於學官善如期至迎芹置坐上請質經義芹曰此士子之業公今有官守何不詢時務邪善益起敬請問今日急務芹出授一簡竟不交言而去視之皆戰守制勝之策也

善心嘉之時靖難兵已出北平善於是密結常鎮嘉松四郡守訓練民兵相約勤王而薦芹爲行軍司馬建文元年善至京師畫策防禦又從大將軍北行尋還京建文君用漢破七國策賤齊黃于外善言於朝曰人有文武才畧可扶顛濟危者及置散地不用今事已狼狽須急召之詢其姓名不對再三詢之曰今人才豈有過於黃大卿者遂復召還二人四年詔善與督蘇松嘉常鎮五郡兵勤王未及戰 文皇即位索子澄甚急于澄避善所約共航海善謝曰公可去善不可去公朝臣可四往號召圖興復善職守土義當與城存亡子澄遂去善爲麾下許千戶等縛見 文皇詰善曰若一郡守乃敢舉兵抗我耶善厲聲不遜死之時年四十三子節謫戍賀縣千戶所幼子繼兒蘇州坐配保兒習正德十一年湖廣巡撫秦金祀善鄉賢祠奕潛心

理學尤精於醫洪武初累薦不起所著有韓山人集

知府徐安

徐安鄞人洪武中舉人材累官濟南知府調鳳陽靖難兵自儀真趨京師奇兵間道從靈壁出鳳陽渡河安謀知拆浮橋絕舟楫拒守靖難兵竟獲魚舟以濟靖難後放歸田逾年舉遺逸有上安名得復任居數載鳳陽諸戚里奏安凌宗親疵細民奪庄田 文皇始怒曰朕昔尚為安所困况若曹乎逮徐安謫戍雲南

知府黃希范

黃希范不知何許人為徽州知府政令嚴明士民信服靖難兵起大修武備金川門失守素服不治事後坐與長史程通善嘗共議條上防禦策為錦衣邏卒一捕去論死籍其家

知府孫鎮

孫鎮合肥人洪武中中制科除度支主事時以課程事罪部官鎮諫不宜連坐謫戍雲南尋復官擢衛輝知府靖難兵至抗節不附壬午秋謫戍山海二十餘年宣德初薦起為上饒縣丞不就自號冲玄子

知府陳彥回

陳彥回字士淵莆田人父立誠歸安丞被誣論死家破彥回謫戍鎮南弟彥困遼東彥回未入滇家人多道死比至蜀惟彥回與祖母郭僅存會赦又弗原監送者憐彥回縱之去顧貧不能歸往依定遠知縣黃積良稱黃姓積良罷依南克縣丞于中和未幾閩中教諭嚴德政薦彥回明經為保寧府學訓導三考至京承顧問陞平江知縣至平江閱十三月上崩彥回入臨給

事 中楊惟康薦彥回文學廉幹陞徽州知府至徽數月政教一新士民感悅建文元年春以循良授上賞是冬郭氏卒承重徽父老走京乞留會彥回哀經赴闕疏乞得復陳氏奪復留徽除彥困戍籍彥回又乞竟服不許許襄事蒞郡再疏又不許葬郭徽郡北十里北山之陽彥回視事時走墓下哭甚徽人名為太守山彥回恒以亡命冒宗為愧悒悒不自安屢欲陳首輒自籌曰祖母年高即蹉跎奈何隱忍二十餘年始得行其志靖難兵至江上彥回糾義勇勤王 文皇即位時械至京師死之籍其家

谷府長史劉璟

劉璟字仲璟其父文成太師也弱冠涵濡經傳喜談兵究極韜略握奇諸書偉貌豐髯議論英發所賦賊葉丁香叛延安侯唐勝

宗討之決策於璟破賊還薦璟才略 上喜曰璟直宿温貌矣召見璟謂曰朕欲汝日夕左右惟閣門使如儀禮司立百官上宣達為職處爾無此官者遂授之賜第馬衣帶金書除奸敵倭四字於鐵簡賜之且命曰百官敢有不法汝持此糾正會谷王封宣德府謂侍臣曰谷王年少誰可羽翼王者謂諸大臣故忌璟對曰閣門使劉璟忠勇果敢可任 上頷之授谷府長史并勅提調肅遼慶寧燕趙六王府事璟嘗至燕 文皇與璟奕璟勝 文皇曰卿獨不少讓也請難兵起璟馳還京獻十六策不聽令不可讓處璟不敢讓也靖難兵起璟馳還京獻十六策不聽令叅議李景隆軍事景隆又不聽璟隆戰敗璟夜半渡蘆溝河水陷馬斃璟力破冰跳躋岸冒雪走良鄉裂趾跋行三十里璟子貊自大同赴難越良鄉至涿州遇璟翼璟上馬奔還家養疾建

文二年璟輿疾赴闕進聞見錄千萬言又不聽令璟還家待用
明年六月建文君遜位璟稱疾不起法官論璟逆叛逮至京見
上猶稱殿下且云殿下百世後逃不得一箇字下詔獄微髮自
經死法官希旨緣坐其家 上不許得歸葬嘉靖乙酉提學副
使萬朝肖像配享文成祠

遼府長史程通

程通字彥亨清溪人祖平謫戍延安通以太學生走闕下上書
請還其祖詞懇惻 上憐而釋之洪武二十三年舉應天鄉試
時遣諸王行邊以封建發策通對 拜遼府紀善二十四年從
王閱武臨清明年從之國遼西靖難兵起從王渡海來朝進左
長史從王之國荊州衛士紀綱者方幸王通輒辱之朝廷遣人
至荊州通上防禦北兵數千言 文皇即位綱入賀留錦衣衛

幸用事乘間言通曩有封事指斥遂械通至京論死家人成
簿錄其家得田數十畝遺書數百卷牯皮數張績溪之程最衆
幸使者仁恕不旁及

知州蔡運

蔡運南康人貢起家歷官四川叅政清勁直諒不諧于俗罷歸
復起賓州知州有惠政靖難後論死百姓憐而思之

知縣顏伯瑋

顏伯瑋廬陵人名瓌以字行聰敏介直能文章建文元年賢良
徵授沛縣知縣靖難兵起淮北民終歲給軍餉伯瑋征戢有方
民不告勞三年六月北兵掠濟寧游兵過沛沛人竄匿伯瑋設
法招徠會設豐沛軍民指揮司集民兵五千人築堡備禦尋調
三千人益山東兵是月望日靖難兵攻沛伯瑋遣縣丞胡先百

夫長邵彥莊間行至徐告急都督援兵竟不至度不能支令其弟珏次子有為還曰汝歸白大人子職弗克盡矣題詩察院壁曰太守諸公鑒此情只因國難未能平丹心不改人臣節青史誰書縣令名一木豈能支大厦三軍空擬築長城吾徒雖死終無憾望采民艱達聖明是月二十二日夜二鼓靖難兵入東門指揮王顯迎降伯瑋冠帶升堂南拜慟哭曰臣無能報國遂自經死時年五十有為不忍去復還是父屍遂自刎以從珏脫走濟寧逾月還沛詢邑人知胡先已收葬伯瑋父子於沛南關外乃至徐告伯瑋友人晏璧璧與伯瑋同郡宦於徐因爲伯瑋傳其事言伯瑋善事父母友于兄弟睦于族媼鄉黨稱其六行無異辭以故守令知而薦之及爲沛令數以事至徐乃同督運德州每連牀共食談誦慷慨練達機宜深喜鄉郡之有人屬縣之

得賢長吏也古語云謀人之軍師敗則死之謀人之邦國危則亡之若伯瑋寄百里之命素志已定視死如歸賢于人遠矣觀此壁亦行誼君子也正統中御史彭勗爲伯瑋起墳築以祠祀之

知縣鄭恕

鄭恕字本忠仙居人治尚書能賦詩善書畫好古博雅家甚貧釜魚甑塵一介不妄取蕭然斗室日與生徒數十人講論經理高風勁節一時敬嚮寧波知府禮聘爲昌國訓導未幾蕭知縣留心撫字民愛敬之建文四年靖難文將王聰攻破蕭恕死之年五十六後籍其家二女當醜亦死之子濂湜姪温汲謫北平種田

理問徐讓

徐讓山西布政司理問不知何許人材氣磊落有口辯應募賞書物至北平議和鮮兵受而不答建文四年五月還授衛鎮撫軍前差遣戰歿

縣丞劉亨

劉亨字嘉會廬陵人博通經史洪武十五年以賢人君子徵辭親老歸養久之復舉經明行修入對稱旨命說書華蓋殿尋言事忤執政出為壽州訓導三十一年冬建文君詔求言上言文武並用久長之術而六卿秩卑於五府當並為一品國子祭酒師表天下士位不當在太僕下諸武臣子弟他日當授之兵宜立學教之使之事上使下禮義之道多見采用陞武進丞修學政課農桑恤孤寡表節義毀淫祠縣旁作善教坊再思亭風厲民庶訟省野闢流亡來歸建文三年賜璽書縣民李德茂馮阿

寶作亂白部守母令滋漫率眾擒首惡戮之諭降散其黨靖難後遣使勞以金帛既而有言亨昔在建文時上書改舊制又坐他事罷歸亨遂杜門不復出有薦亨修永樂大典者力辭疾湖廣廣東聘考試官皆不就宣德中監察御史尹崇高復言亨孝行雖老可為師表官亨造朝自言年將八十不足任教事上曰伏生九十尚傳經八十為教官何不可亨懇辭吏部尚書郭璉曰孔子言老者安之朝廷豈少此一人宜聽還鄉自便得歸正統中年八十二卒

縣丞衛健

衛健山西孝義丞不知何許人讀儒書達更事膽智過人與徐讓同應募使北平不容健曰願殿下熟思之亦不聽還授衛鎮撫與讓並赴軍前差遣後戰歿

教授陳思賢

伍性原 鄒君默

陳應宗 魯廷瑞

林珏 呂賢

陳思賢茂名人質直好義洪武末為漳州府學教授以忠孝行
執事諸生隨才教誨多所成就 文皇靖難詔至慟哭曰明倫
之義正在今日遂堅卧不出迎率其徒伍性原陳應宗林珏鄒
君默曾廷瑞呂賢即明倫堂為舊君哭臨如禮郡人執送京師
思賢暨六生成以身殉或曰死于道嘉靖中提學副使邵鏡立
祠祀之

教諭王省

王省字子職吉水人洪武五年領鄉薦至京詔免會試吏部次
第擢用省以親老乞歸養尋以文學徵 上親試稱旨當殊擢
省自陳才薄親老乞便養得浮梁教諭外艱起復改睢陽凡八
年又改濟陽靖難兵至省為游兵所執從容引譬詞義慷慨衆

舍省省歸坐明倫堂伐鼓聚諸生謂曰若等知此堂何為名州
倫今且勿多論只說君臣之義何如省大哭諸生亦哭遂以頭
觸柱死女靜適即墨周簿聞靖難兵至濟陽謂父必死三遣人
訪竟得遺骸歸葬省子貞為夔州通判亦抗節死賊中

主簿唐子清

唐子清沛主簿也不知何許人在沛有善政民愛之顏知縣守
沛專調兵食 日星 察事皆付子清靖難兵執子清欲殺之將
兵者欲且留子清不屈死

吏目鄭華

鄭華臨海人字孝思洪武十八年進士初授行人奉使川廣有
令名建文元年註誤謫果平吏目靖難兵起謂其妻蕭曰吾義
必死柰親老汝少何妻泣對曰君能為國妾獨不能為君乎乃

稱病尋醫携家托友人無錫丞趙次進亟還州州長貳以靖難
兵且至盡棄城走去華獨率民吏憑城守力不支請援山東又
不至不食五日而死

典史周縉

周縉字伯紳武昌人以太學生授永清典史廉謹攝令事捕蝗
弭盜靖難兵起永清地近燕縉極力拒守縣民寡弱相帥逃散
縉度不可為懷印南奔將他圖道聞母喪歸終喪即出糾義旅
勤王戎器數日略具聞南師燔遂去匿民間壬午十月丁巳吏
部言前北平屬州縣官朱寧等二百九十人當 皇上靖難時
俱棄職遠避宜寘法典命入粟贖罪屯戍興州有司遂械縉至
京謫興州居數年子代還年八十終於家吳文定公嘗為縉傳
以故得獨傳寧等竟不可考

典史黃謙

黃謙亦不知何許人以儒生為沛典史果敢能戰下類知縣禮
遇之益効力盡職靖難兵欲執至徐招降謙不屈而死之

盧振

盧振靖難兵起與徐輝祖齊黃謀畫攻守効力為多靖難畏之
壬午秋逮至不屈榜振名數其罪殺之夷其族

牛景先

牛景先禦靖兵數有功金川門失守景先變姓名異服出走死
蕭寺中已而窮治齊黃黨逮景先妻妾發教坊司

周濬

周濬建文中從將校戮力戰守靖難後不屈子之妻王氏子浴
兒皆沒官

謝昇

謝昇當建文時練兵給餉夙夜効勞靖難後不屈死之振景先
瞻昇皆不知何許人亦不知其始所自起任何官或曰瞻諸城
邑人

龔翊

龔翊字大章崑山人年十七爲金川門守卒建文末靖難兵首
入金川門翊大哭後還鄉宣德中周忱巡撫兩薦爲崑山太倉
學官辭不就曰翊仕無害於義恐負往日城門一慟耳竟隱身
門人私謚爲安節先生

儲福

儲福無錫新安鄉人也洪武初隸燕山衛籍年二十餘頗好義
建文末携母妻逃去 文皇即位詔扶購戍卒入伍至燕山福

在錄中調曲靖衛復挈母妻以行因仰天哭曰吾雖一介賤
義不爲叛逆之人在舟中日夜泣不輟竟不食而死母歸妻覓
爲營地葬之范時年二十有姿色居貧奉姑甚謹每哭其夫則
走山谷中大號不欲聞之姑也官有聞其寡者欲委禽焉既而
聞其事曰此節孝婦也我安忍犯之一日范往澗水邊浣衣見
其傍草生若蘇席草因取之織席售養姑姑賴以存姑年七十
餘終營葬爲廬于墓傍范年八十餘卒席草遂不生土人義之
卽其廬葺爲庵集尼居之名崇孝庵

松江同知

松江同知者不知其姓名勤王詔下同知榜募義勇入援極言
大義感動人心并述靖難之兵垂恩遠義 文皇既即位械至
京磔于市

舉人劉政

劉政字仲理長洲人父有經學為沛學教諭政聰敏力孝治春秋建文元年秋方孝孺試圻府士千五百人題命論語托孤寄命節不可奪竟得政卷孝孺喜曰此烏中孤鳳當虛左處子為科登書二百十四人政第一四年建文君遜位殺孝孺政慟哭不食死之或曰政在永樂中誓不復仕授徒終其身

生員高賢寧

高賢寧濟陽儒學諸生也受學於教諭王省建文中貢為國子生靖難兵攻濟南不下以箭射書城中使丞降賢寧時在城中作周公輔成王論射城外請罷兵靖難後被執 文皇曰此作論秀才邪秀才好人命官之賢寧固辭其友紀綱時為錦衣指揮倖用事勸賢寧就職賢寧拒不聽曰君以軍旅發身余本書生食祿有年於義不可綱言於上得遣歸年九十七卒

建文遜國臣記第六卷

吾學編第五十七

海鹽鄭曉

某部郎中梁田玉

梁田玉定海人歷官至郎中靖難兵入金陵田玉與葉御史俱
髡髮爲僧避去久之松陽人王詔遊治平寺觀轉藏聞藏上嘆
嘆有聲異之令人緣藏登絕頂無所見見書一卷載建文時出
亡臣僚二十餘人事紙毀泮字多斷爛不可讀讀數日稍稍銓
錄其可識者得田玉郭良梁中節梁良用宋和郭節何洲梁良
玉何申凡九人人僅數言詔憐其忠又得之異各贊數語題曰
忠賢竒秘錄贊良玉曰行儒名釋知我者誰至寶于淪沒久而
同輝

中書舍人梁良玉

梁良玉亦中書舍人梁良中族也靖難後訣妻子易姓名挾微
貲走出金陵城逾嶺至海南寓市肆鬻書為業以死贄曰忠臣
蹇蹇遵彼海濤耽書玩市資以盍簪屯如遭如哀此陸沉

中書舍人何申

何申不知何許人為中書舍人建文末奉使四川至峽口聞金
川門不守發憤慟哭吐血不數日疽發背死贄曰兩涯洶洶中
作霹靂義氣馮殷與之俱激奸諛過此寧不惕息余乃為隲括
王子之詞合而銘之曰今吾故吾知我者誰齧若漆身希蹤采
薇戢戢潛龍寥寥宜鵠豈吝姬疇而甘漢卜山椒水滌天涯海
濤會其可逢鼓以南音肯欠一死以明我心白霓晝見虞淵沉
沉孰呵護此悠悠古今嗟乎靖難時死者無慮千人宋張林黃
諸君子百方搜考僅得百餘人此二十餘人者幸而不死又得

好義者密錄其姓名藏之蕭寺秘處歷百餘年而王詔始見之
縉雲鄭僖為識其事竟以紙字磨滅故僅得九人其十一人不
可考矣

中書舍人宋和 郭節

宋和郭節皆中書舍人也不知何許人靖難後變名挾卜筮書
走異域賣卜給衣食客死

梁良用

梁良用亦定海人父子兄弟八人同仕于朝靖難後相率變姓
名避去良用去為舟師已而死于水或曰梁氏父子兄弟為舟
師投水死者五人贄曰泛泛栢舟載浮載沉中流誓楫懷我好
音肯欠一死匪名是尋以完我族庶明我心

梁中節

梁中節定海人未詳仕何官少好讀老子太玄經靖難後與郭良棄官同走出京爲全真入山修行

何洲

何洲海州人不知仕何官與宋和郭節友善素以忠義相勗靖難後遂相約棄官爲筮人客死異域竟莫識其姓名王詔合和節洲而系之贊曰箕子陳範嚴氏隱卜義有從否道有宜告烈烈英賢寥寥宜鵠

郭良

郭良不知何許人靖難後與梁中節相約棄官爲道士去贊曰駕言導引嘯傲林臯顏波莫挽使我心勞

雪庵和尚

雪庵和尚名暨不知其姓靖難初方黃之獄殺幾萬人即不殺

謫戍窮邊不死於道死於邊者又幾萬人當是時和尚壯年始慟哭落髮爲僧西南走重慶重慶大祝善慶里山水奇絕可廬和尚又走善慶里墟中有隱士杜景賢知和尚非常人與之遊往來白龍諸山山旁有松栢灘灘水清駛蘿篁森蔚和尚欲寺焉景賢豪有力亟爲之寺寺成和尚率其徒數人入居之昕夕誦經山中人不知書謂且誦佛經乃不知其誦易乾卦也景賢曰和尚相釋而誦儒不可請誦佛經景賢意和尚不宜誦儒書恐有踪跡然又不能肯顯言則恐和尚走去以故婉解之乃和尚亦知景賢意遂將儒經不誦且誦觀音經寺因名觀音云和尚好觀楚詞時時買楚詞袖之登小舟急棹灘中流朗讀一葉輒投一葉於水棹已輒哭哭已又讀讀終卷乃已衆莫測其云何景賢固知之然亦不問和尚和尚好酒不戒酒日注酒一

壺侯客客至輒飲客不至即拉樵牧豎入飲飲半酤呼兒童歌曰我歌爾和歌竟瞑焉而寐和尚頎形秀爽指柔白剪剪落筆成章詞不甚工密然意氣煥發又能感愴人或曰和尚當建文壬午爲御史不數月帝遜位和尚固秘跡以死死之日其徒問曰師即死宜名何許人和尚張目曰松陽問其姓名不答和尚有詩若干篇今且百四十餘年尚未敢顯行於世或曰此松陽葉希賢也以賢良方正舉爲監察御史

河西傭

河西傭不知何許人建文四年夏六月成祖入金陵即帝位傭被葛衣走是冬至金城行乞市中金城邊地極寒常衣葛明年過河西依莊浪豪魯家爲傭傭亦取直稍稍積買羊裘披之雖寒必覆之故葛衣葛亦破縷竟不肯脫故葛衣夏或衣暑

布布即新故葛衣輒覆其上人勸之棄故葛衣不肯棄直悶悶不答傭錢稍有餘走市中買牛肉酒與諸乞兒食飲傭力作倦時自吟哦或夜聞其哭泣聲未樂中有留都官從宋總兵至莊浪者識傭欲與語傭走南山中避旬月留都官去乃還有問留都官傭何人者留都官亦不答在莊浪數年病且死呼主人謝囑曰我死勿殮我官幸西北風大起火我無埋我骨魯家便從其言

川中補鍋匠

川中補鍋匠亦不知何許人往來夔慶間爲人補鍋至州邑不過三日即去去又復來夔慶人有欲學補鍋者即教之補鍋不索謝錢直令挑担從有後曹學者至即遣先學者去如是數年夔慶間人識之皆呼爲老鍋匠補鍋或與錢布米不擇當食時

與之食即不復索錢錢稍稍積囊中遇風雨寒暑不出補鍋即
出錢買酒飯自飲食常寄宿蕭寺中或夔州市中逢馮翁者二
人相顧愕然已而相持哭哭已相牽入山岩中坐語竟日學補
鍋者屏不得聞二人語語已又相持哭且別去言今永訣不可
復相見已竟莫知其所終蜀中峨眉亭嘗有建文遺臣題詩云
一個忠成九族殃全身遠害亦天常夷齊死後苦臣薄力為君
王固首陽

馮翁

馮翁亦不知何許人在夔州以章句訓蒙給衣食能為對句及
古詩詩輒自題馬二字或馬公或塞馬先生嘗作詩大書壁間
比見補鍋匠即剗去詩曰夜夢何期特龍飛天漢津朝橫滄海
兩夕過滇池濱光燁皆五色蜿蜒無損鱗淵田變化間張主藉

高皇時蓋永樂甲申乙酉間未幾辭主人去莫知所終

東湖樵夫

東湖樵夫樵浙東臨海東湖上日負柴入市口不二價建文上
午秋詔至臨海湖上人相率走聽詔或歸語樵夫曰新皇
帝登極樵夫愕然曰建文安在荅曰焚宮自去矣樵夫慟哭遂
投湖水中死竟不知何許人

論曰余聞之陶徵士言齊二客魯兩生史並失其名操行之雖
而姓名翳然撫卷長嘆不能已已余獨幸夫雪庵諸君子忍垢
茹荼卒晦其名以不滅其族也

建文遜國臣記第七卷

吾學編第五十八

戶部尚書王鈍

海鹽鄭曉

王鈍字士魯太康人故元進士為猗氏尹洪武十年舉秀才授
 主客主事改長沙通判坐事免後舉明經授大名通判遷吏部
 郎中福建叅議陞叅政寬慎廉介民懷其惠坐轉漕不給當罷
 特宥召遣持節諭撫麓川平緬却贈金或曰夷且疑貳柰何鈍
 受之悉輸雲南省歲還陞浙江左布政使憂去建文初陞戶部
 尚書靖難兵至鈍踰城走靖難後召見曰爾向輔建文間朕骨
 肉今何顏耶鈍頓首慙謝命致仕月給尚書半俸永樂元年六
 月鈍上言軍令屯種數事皆從之復命往北京山東撫綏軍民
 經理屯戍二年四月仍浙江布政使與勅致仕卒子壘官至戶

部侍郎

工部尚書嚴震直

嚴震直為程人洪武五年起家布衣授試參議尋授戶部郎中
陞工部右侍郎逾年進尚書二十六年鄉民訴其弟姪不法
上付震直訊執具獄 上以為不欺赦其弟姪已而坐事降監
察御史使龍州二十八年桂林靈渠尋右陞都御史復為工部
尚書洪武三十年二月震直尚論兩廣鹽法廣鹽得行江西安
贛吉臨諸府震直質直勤敏 上數稱之時時賜食復其家靖
難兵起震直督餉齊魯間兵敗為北兵所縛置布囊兩馬夾昇
至北平建文君遜位後復為工部尚書奉使安南至雲南見建
文君悲愴吞金而死震直魁梧幼不喜讀書力田供徭賦顧長
於算數寡學識諸權貴人皆喜之

侍郎學士王景

王景字景彰以字行松陽人洪武初起家懷遠教諭歷知州山
西參政謫雲南建文君召為知縣留與修高廟實錄母憂去服
闋吏部尚書張紘為雲南布政使時知景薦陞禮部右侍郎兼
翰林侍講文總裁官靖難後進學士時言建文君崩 上問景
葬禮景頓首言宜用天子禮 上從之景博學能文章善書

侍郎學士董倫

董倫字安常恩縣人僑居宛平質直有文學遨遊林間布褐
藜藿淡如也從遊者眾稱具川先生勝國時累辟不起國初擢
用單縣儒士張寧寧薦倫洪武十五年遣使徵為右贊善事懿
文太子陳說忠厚十八年擢左春坊大學士太子卒出為河南
左參政留情民瘼嘗上封事數千言又薦肇州吏目諸葛伯衡

上擢伯衡陝西右叅議三十年註誤免官典教滇南建文君在東宮憐其老且遠去賜白金若干鎰至成都蜀獻王敬禮倫抵開心訓化不忍鄙夷其人雖蠻童僂豎皆知向慕建文君即位念舊臣屢詢倫左右亦多薦倫者召拜禮部侍郎兼翰林學士賜御書怡老堂扁及髹凡玉鳩杖各一倫上表謝略曰桓榮設几杖于太常不聞宸翰之賜晏殊題舊學於神道未見几杖之頒自今將杖以戒噎則當思四海或有饑餒之民憑几以安身則當念一物或有顛連之嘆或曰此孝孺代筆也初監察御史解縉嘗代夏長文作劾都御史袁太書大恨縉中傷縉上令縉十年著述來京擢用未及期 上崩縉赴臨有司謂赴臨非詔旨謫縉河州衛史縉與倫書祈援倫左右縉得召還為翰林待詔倫為人質直敦厚富文學為時所重建文間屢懇言宜親

宗人不聽靖難後倫年八十餘令致仕出京師悒悒成疾不數日卒

大理少卿薛崑

薛崑閬鄉人慷慨負志操有治才口辯建文三年以鎮江知府為大理左少卿是年方孝孺建議草詔令崑齋至北平又作宣諭數千言刊印千紙付崑令密散北平諸將士崑見 成祖曰上言殿下且釋甲謂孝陵暮即旋師 成祖叱曰事至此尚誰欺左右請殺崑 成祖曰天子命使也釋之歸靖難後免崑死謫廣西永樂初安南王孫陳天平自老撾來歸季犛子蒼請天平歸還國上命廣西總兵黃中以兵五千送天平歸中舉崑為輔行至芹站伏發劫殺天平崑被虜死

少卿學士高遜志

高遜志字士敏蕭縣人元末僑寓嘉興好問學嘗侍父宦遊吳中受業宣城貢師大鄱陽人周伯琦遂昌鄭元佑為文學深純典雅成一家言年二十五為鄧山書院山長洪武二年徵修元史入翰林為編修累遷侍讀學士建文時太常右少卿兼學士庚辰會試與董倫為考試官所舉進士胡靖吳溥楊子榮楊溥胡濙輩靖難後皆為名臣遜志存沒不可攷是科同預較藝者右拾遺朱逢吉編修史官吳勤葉惠仲趙友士徐旭張秉彛監試御史王度俞士吉皆一時之選惟忘仲王度死難餘皆位如故徐旭求樂初為吏部郎中與逢吉皆預重修高廟實錄旭陞國子祭酒士吉求樂初為僉都御史

國子祭酒張顯宗

張顯宗字明遠汀州寧化人少喪父母黃守志訓教顯宗以文

學著名洪武二十四年進士及第二十九年以編修陞太常寺丞賜衣一襲三十年署國子祭酒事建文君即位為真上便宜數事學政一新壬午正月陞工部右侍郎靖難兵至淮顯宗奉詔起義兵江西募民出粟給軍餉六月復還為祭酒靖難後江西兵執顯宗及布政使楊璉按察使房安僉事呂昇至南京謫顯宗等戍興州後平交趾起顯宗為左布政使勞來撫戢夷民安附永樂七年卒於官顯宗性行孝友政事敏達時以文學飾吏事會交趾初平人情未定清林知州王賦武寧知州魏思善能奉行顯宗約束皆有惠政並卒於官

侍講學士王達

達字達善無錫人洪武間為大同訓導過北平私上謁成祖成祖喜禮達建文末薦陞國子教授靖難後姚廣孝又薦達陞

翰林編修再陞侍讀學士達謙和恭慎能詩文 上嘗問達建
文君事對曰建文君亦可與爲善顧輔導非人耳 上終薄達
一日達侍問達十难字達識其八 上曰朕更有難字难汝達
懼服銀屑死 上顧憐之命有司歸其喪或曰達草靖难登極
詔或曰草詔者括蒼王景學士也

韓林侍讀唐愚士

唐愚士名之淳以字行山陰人建文二年勅翰林侍從之臣方
孝孺等集數千載經史中事爲一書以攷治亂爲鑒戒命舉優
通文學之士孝孺首薦愚士愚士時寓金陵爲李景隆子師立
召爲翰林侍讀賜金冠令與孝孺俱領修書事進講前漢書愚
士少負奇志好學父肅仕國初應奉翰林文字有文章名愚士
得遊公卿間宋濂稱其文勉之進學肅諫死臨濠愚士奉喪歸

葬求父遺文雖荒郵敗壁高崖斷石靡不纂錄什襲時亡伏讀
聲淒切動人聞者掩涕愚士長身巨鼻博文多識練達世故爲
文對瞻尤長於詩翰洪武中數從景隆徧遊燕薊秦周所過廢
都舊邑名賢古地遺跡輒爲詩歌論記詞旨超絕性喜飲酒亡
酣高談傾坐晚得官近侍未幾病病愈復起明年病甚比卒遺
言請銘孝孺愚士貧無他宗族喪事數千百婚倚辦景隆孝孺
爲聞 上詔有司給舟歸葬

翰林侍講樓璉

樓璉字士連金華人嘗從宋濂學洪武中以儒士召歷宣寧仁
壽主簿藍田知縣擢廣東道監察御史謫戍雲南建文君嗣位
屢下詔求賢璉以文學舉入翰林侍經筵官至侍讀靖難兵入
京 又皇命方孝孺草詔孝孺哭且罵授之筆擲其地曰身可

死詔不可草改命璉及王景璉惶惧不敢辭歸而憤悶妻子問之曰得無傷方先生邪璉愧曰我受刑尤可正恐累及爾輩乎遂巡一夕自經死

翰林侍書宋懌

宋懌字子夷金華人文憲公孫也懌父燧中書舍人懌思紹父學奉母孝蜀獻王聞之時賜粟帛賜其家專心力孝書益工建文即位念濂為興宗儒李之臣召懌入翰林為侍書與劉彥銘朱思平皆知名建文時而璉門人有聲稱者同郡樓璉浦陽鄭楷皆見擢用永樂十年濂孫情坐鄭公智黨刑部侍郎張本請罪情 文皇曰濂名儒開國時事 皇考左下有勞日久原情勿問

尚寶司丞李得成

李得成涑水人父德儀早卒母張氏洪武初避兵溺死得成卧水求其屍塑父母像與妻事之甚謹洪武十九年縣舉孝廉為大官署丞二十四年改太常贊禮郎二十五年又以割肝報効之忠 尚寶司丞二十七年八月旌其門孝子學士劉三吾為傳其事 難兵起景隆敗于德州濟南被圍急黃子澄等謀緩燕師遣人訶和得成慷慨請行見 成祖濟南城下請回軍還燕 成祖必欲得齊黃乃肯解兵遣得成歸報朝廷以得成辱命下獄已而宥之永樂初陞陝西左叅政歷陞陝西右布政使數上言民間疾苦

監察御史尹昌隆

尹昌隆字產謙太和人洪武十八年進士授翰林修撰改監察御史建文即位初朝晏昌隆諫曰 太祖高皇帝鷄鳴而起昧

爽而朝未嘗日出臨百官百官于是乎戒懼故能庶績咸舉天下安也陛下嗣守大業固宜追繩祖武兢上業業憂勤萬幾未明求衣日旰忘食常如不及今乃溺于晏安日刻甚晏猶未臨朝群臣宿衛疲伺廢業上下廢弛臣恐播天下傳四夷非社稷福也建文君曰昌隆言中朕過禮部可頒示天下使人知朕過元年京師地震昌隆疏言奸人專政陰盛陽微謫見于天執政大怒斥為福寧知縣未幾中使誣昌隆詛說下獄事白得釋靖難兵南下昌隆上書言今日時勢日去而北來章奏言周公輔成王不若罷兵息民許其入朝彼既欲申大義于天下不應便相違戾設或有蹉便須讓位不失守箴若呻吟不斷禍至無日進退失據雖欲求為丹徒布衣不可得矣不報靖難後昌隆名在奸黨驅出就戮昌隆當陛大呼曰臣當時曾上章勸讓位陛下

下奏牘尚在可覆也命緩昌隆刑檢奏有之上曰火燒頭早從此言南北生靈受禍不若是酷朕亦無此勞苦遂貸昌隆死未幾以為北平按察知事行部主事預儲議進左中允漢庶人惡昌隆改為禮部主事尚書呂震喜屬官諂忌昌隆誣昌隆與谷庶人通謀論死沒其家震病時時號呼乞解曰尹相尹相妻子問其故曰昌隆守欲殺我震竟死

國子博士王紳子稱

王紳字仲縉文忠學士禘之子年十三穎敏過人幼鞠于兄綬最恭順痛父死義尤孝事母母卒哀毀未幾兄綬亦卒塋葬築苦卓負竒志博讀經史百家言發諸論縱橫磅礴沉思銳氣俯視朋流宋濂一見竒紳曰華川有子洪武十五年蜀王禮聘抗客禮教授蜀郡紳痛父遺骸未返丘隴曰王走雲南慟哭原野

行求久之不能得即奠死所仰天一號幾絕日夜悲哀滇人感
愴稱王孝子紳因述滇南慟哭記時雲南布政使張紘重紳純
孝爲作吊王翰林文建文君即位以給事中涂誠御史黃凱薦
召爲國子博士預修高皇實錄與方孝孺友善嘗尊孝孺爲
百代儒宗勸著書述來季孝孺不應紳意悟自是略文藝潛心
道德建文元年四月紳上言父死節狀且曰陛下方降孝治而
明詔又有旌表節義之條正微臣得展情事之時先臣志節獲
伸之日也下翰林定議降制曰朕纂承洪業大賚四方文武之
臣勲庸勞烈著于天下者咸思褒封寵錫以崇德報功况於守
節秉義之臣命書愍贈曷可忘哉故翰林待制王禕博季旌文
顯名當世久事皇祖夙夜至廷獻納論思數被嘉獎修史擅三
尺之譽泣民兼四善之稱蘊才而弗克大施御命而擅先出使

導滇民而歸化宣皇威以懷柔豈期携貳以詭謀竟致忘身而
殉義歷年滋久卹典未遑暨嗣息之疏陳乃具懷而慨嘆是用
職陞禁從鎰錫美名循彛制以勸忠推茂恩而示訓尚惟冥漠
服此殊榮特贈翰林院學士奉議大夫謚文節開國以來文臣
有鎰者寔自禕始時蹇義被拔擢而與時浮沉紳上書勸之曰
執事方負天下重望治否安危固係于進退去取之是非而所
任非其所長所職非其所事位高於器則有覆餗之患才過於
職則有積薪之譏非其才而強委之至于僨事則是執事欲爲
尋常無聞之人而不可得况敢望其逸樂優游而與時俗上下
乎義得書極憾之建文二年卒年四十有一有繼志齋集三十
卷藏于家子稔字叔豐少有志行壯力問季性至孝紳痛念父
沒食不兼味稔遵教子孫相承數十年不變父母喪三年酒肉

未嘗入口學問該博士從遊日衆有青巖稿聖朝文纂金華賢
達傳續文章正宗卒年五十九門人私謚孝莊先生徐初從孝
孺靖難後嘗欲與孝孺表姪鄭殉至聚寶門外負其遺骸歸
葬不可得坐逮繫獄 文皇念棉忠特宥之且用徐徐辭疾讀
書青岩山下將終身焉徐與童景庸言書痛念遜志名蹟日就
湮沒欲執事與令兄商確搜輯其孝行幽潛生卒始未爲家傳
行狀以傳同志有愛慕之心者自能默識謹藏或可待時發揚
松萬一稔遂輯方氏遺文爲侯城集後百年始傳

按察僉事葉砥

葉砥字周道一字履道上虞人有孝行洪武三年進士除定襄
縣丞八年坐累謫涼州砥處之裕如日杜門力孝時法峻謫士
伍河西者喜從砥遊建文元年詔求賢陝西按察羅副使臨江

知府劉鵬上虞知縣李惟中皆薦砥史才召爲翰林編修因史
或又薦砥才任風憲改廣西按察僉事未樂初坐修史書靖難
事多微詞被逮籍其家惟薄田廬故書數篋事白仍與史事書
成改考功郎中尋副總裁永樂大典侍講東宮即中三考加俸
二等職如故砥重聽誤謂授他職上爲寫授砥砥不自安求去
不許請郡得饒州知府年八十卒于官

知府劉有年

劉有年廬陵人徙沅州洪武中明經起家爲監察御史學行有
聞尋辭官養母忤旨謫傳舟通州有年至通州讀書不鮮得儀
經十八篇于州故家上之詔藏秘閣建文君起有年徒中爲太
平知府靖難坐不肯迎駕謫雲南西平侯知有年賢遣諸子從
學且薦於朝及交趾平以爲按察僉事卒官黃福贊有年江湖

曾中洙泗規模文宗韓學本程朱

典史魏澤

魏澤字彥恩溧水人有學行洪武中累遷至刑部尚書先是文皇南下姚廣孝曰殿下至京幸全方孝孺殺此人則天下讀書種子絕矣文皇曰此至京建文君遜去遂召孝孺問曰我法周公匡成王成王不在當議所立對曰殿下既以匡王室而來成王不在當立成王之子忤旨因有滅十族等語遂械繫獄以廣孝言未殺孝孺且收捕其族黨每捕至輒下獄牀孝孺終不屈乃盡殺之澤是時謫為寧海典史當捕方氏悉力保護周全以故方氏有遺育謝文肅公詩所謂孫枝一葉者澤之力也後過孝孺故居為詩悲悼笥與衝雨過侯城撫景令人感慨生黃鳥向人空百嘯孤猿墮淚只三聲山中自可全高節天下難

居是盛名却憶令威千載後重歸華表不勝情

衛卒羅義

羅義山西清遠衛戍卒也靖難兵起義詣闕上書乞息兵講和又錄上文皇書言殿下聰明英武今之周公也宜謹守燕土以法周公輔成王之義嘗聞夷齊以國相讓去隱首陽聖賢欲成天下之事必先明順逆之理成敗之勢禍福之機又得天道之宜人心之安然後可殿下今以藩國敵朝廷即遂其願尤為不可况萬難無一易哉乞早息兵歸國書上下義獄建文四年六月庚辰上出義獄中擢戶科給事中未幾陞湖廣左叅政

建文遜國臣記第七卷

終

子履準校正

建文遜國臣記第八卷

吾學編第五十九

海鹽鄭曉

都督平安

平安初名保兒滁州人 太祖養保兒及周舍道舍馬兒金劉
奴也先買驢直童潑兒爲義子分守新附城邑安父定從 太
祖起濠梁積功至濟寧指揮僉事又從常遇春定山東下河南
克元都戰沒平襲陞密雲指揮使洪武三十一年擢右軍都督
僉事靖難兵起克叅將從景隆而北設伏白溝河敗績營單家
橋邀北餉舟疑不敢進景隆敗鐸山安援景隆殺陳亨還與鐵
鉞共守濟南已而朱能兵至安敗之轉戢東昌告捷又戰單家
橋執薛祿祿逸去復戰陳暉不相援安遂敗藁城之役安陷陣
先登衆不繼三戰三敗進攻北平又戰敗援保定不克建文四

年進副總兵帥遼東兵復通州不克退戰肥河靖難兵伏發夜
敗安安轉戰小河殺王真 成祖督戰甚急安挺鎗大呼馬蹶
弗得前王麒又奮刀入安陣逼安安遂退又戰靈璧安及陳暉
馬溥徐真皆被執安力舉數百斤果勇善戰亨真皆驍將並爲
安所殺安就執靖難諸將皆喜或請殺安 成祖惜其才勇釋
縛簡銳卒衛送之北平且令 仁宗郭資善視安已而掌北平
都司事進北京行後府都督僉事永樂七年三月 成祖見安
忽問曰安乃尙無恙安慚懼遂自經即今武安侯成山伯即亨
真後也

都督審忠

審忠累官都督建文元年充征勇右副將軍與駙馬都尉李堅
從大將軍至北平八月及靖難兵戰于真定敗奔滹沱河戰又

敗與都督顧成都指揮劉遂皆被執忠之妻都督徐凱女也後
與凱同死

都督潘忠

潘忠歷官至都督將兵屯雄縣建文元年八月靖難兵至雄破
其東門忠至月漾橋遇伏戰敗被執

都督袁宇

袁宇壽州人父洪開國功爲左都督宇事建文君有軍功爲指
揮使韓王妃及李景隆妻宇兄弟也宇從景隆北進有功陞後
府都督同知建文三年六月壬午靖難將李遠出沛泗掠餉道
宇率步騎三萬邀遠中伏大敗宇脫身走以弟容爲 文皇駙
馬都尉封廣平侯故得不死建文四年七月宇練兵雲南

都督楊松

楊松積功官至都督勇果敢戰靖難兵起列營雄敵至輒敗
與潘忠皆被執

都督馬溥

馬溥壽州人父鑑開國有功官至都督僉事溥襲武德衛指揮
僉事建文君初陞都督四年夏與徐真并克叅將遇靖難戰敗
靈壁皆被執溥子春為周府儀賓清雖後有溥令改建周府

都督陳暉

陳暉始為洮州衛指揮累功至都督克副總兵與靖難兵戰真
保滄德間互有勝負已而戰敗被執送北平建文四年八月遣
之江西叅贊總兵韓觀軍事觀開國功臣韓成子也

都指揮房昭

房昭都指揮守大同建文三年七月引兵入紫荆關掠保定登

山結寨號召義勇承制授指揮千百戶進據易州西水寨寨在
萬山中四面險峻惟一徑攀援可上昭守寨集兵糧進攻北平
文皇惡昭逼藩府急回軍渡滹沱河八月真定將官都指揮常
諱率兵萬人運餉援昭 文皇曰昭得諒兵糧卒未可破比至
餉入寨遂進兵合圍真定裨將都指揮花英鄭琦來援陣殺眉
山下合戰大敗英琦及都指揮王恭詹忠等皆被執昭諒脫走
西水寨遂破永樂元年昭尚為將官備禦宣府

都指揮唐禮

唐禮歷官都指揮靖難兵起盛將軍以徐凱敗於滄州引兵出
德州營於東昌禮素稱戰將令將騎兵數後而以孫霖為先鋒
營滑口靖難兵夜襲破之擒禮霖遁走

都指揮孫狗皮

孫狗皮徐州人歷官北平都指揮建文中數從諸將力戰有功靖難兵畏之已而戰敗被執永樂元年坐死宥之降百戶

都指揮葛進

葛進歷官河南都指揮使充偏將從大將軍北進建文四年正月朔靖難兵至藁城時進爲先鋒率步騎萬人渡滹沱河半渡靖難將李遠擊之進見遠兵稍退繫馬林間步卒短兵接遠誘進潛師出進後盡解林間繫馬急鼓衆擊進進兵失馬大敗脫身走靖難後坐死宥之

太監吳亮

吳亮者建文中官最親幸建文君焚宮遜去文皇疑匿于僧溥洽所永樂乙酉以他事禁錮溥洽命胡給事中湊以訪張邈邈爲名又遣太監鄭和等下西洋備物色不可得正統七年有

僧出自田州土官所至藩司自稱建文皇帝曰我自蜀歷滇遊方至此今老矣欲送骸骨歸故鄉官司奏上驛送赴京號爲老佛至京寓大興隆寺京城內外僧拜謁無虛日皆曰此海外高僧科道官屢上言恐其惑衆乃下獄朝廷不忍以亮經侍建文君使審視老佛見亮即曰汝非吳亮耶亮曰不是曰我昔御便殿食子鵝葉片肉于地汝時手執壺狗飴之何謂不是亮伏地哭不能仰視復命畢自經死遂取老佛入西內卒葬西山不封不樹鄞人黃潤玉有學行爲廣西提學親見建文君趺坐藩堂曰我朱允炆也身長巨鼻聲如洪鍾

